


十一




十二



十三

建文四年至永樂二年





國權

鹽官談遷孺木著

成祖啟天弘道高明聲運聖武神功純仁至孝文皇帝御諱棣

太祖高皇帝第四子也母碩妃玉牒云高皇后第四子蓋

史臣因皇帝自稱嫡沿之耳今南京太常志寺載孝陵附

碩妃穆位第一可據也洪武年封燕王晚奉命屢出塞

擊胡深入有功狀貌奇偉美鬢英武寬仁豪傑樂用其善

武事老将皆謂不及也及太祖賓天太孫嗣位削藩東

濕諸王多不自安建文元年七月燕王稱兵於北平去其



年紀但稱元年

壬午建文四年實錄稱洪武三十五年

六月朔大兵渡江

乙丑燕王入南京傳檄散天下兵

諭在京軍民人等予日者固守藩封以左班奸臣竊弄威福

骨肉被其殘害起兵誅之蓋扶持社稷保母親藩也今撫定

京城奸臣之有罪者予不敢赦無罪者予不敢殺或小人報

仇擅綁縛劫略禍及亡辜非予本意首惡聽擒餘不許擅縛

其左班奸臣太常寺卿黃子澄兵部尚書齊泰禮部尚書陳

迪都察院左副都御史練安翰林侍講方孝孺禮部侍郎黃

觀大理寺丞鄒瑾少卿胡閏戶部侍郎郭任盧迥刑部尚書

侯泰侍郎暴昭戶科給事中陳繼之工部尚書鄭賜右侍郎

黃福前監察御史尹昌隆吏部尚書張紱侍郎毛泰監察御

史董鏞曾鳳韶王度高翔魏冕宗人府經歷宋徵戶部主事

巨敬又榜奸惡官員具如前首方孝孺加戶部尚書王銳禮

部侍郎黃魁左拾遺戴德彛兵科給事中韓永燕府左長史

葛誠翰林脩撰王叔英衛府紀善周是脩護衛指揮盧振沛

縣知縣顏伯瑋北平左布政使張昂戶部侍郎卓敬兵部尚



書鉄鉉兵部郎中謝昇戶科給事中龔泰副都御史茅大方  
徽州知府陳彥回蕭縣知縣鄭恕錦衣衛都指揮使總兵官  
都事宋忠蘓州知府姚善刑部侍郎胡子昭左僉都御史周  
璿南昌知府葉惠仲高不危德慶侯廖鏞魏國公徐輝  
祖

丙寅諸王群臣請即位不允

丁卯衡府紀善周是脩自經於應天府學是脩泰和人洪武  
中除霍丘訓導高帝問其家居曰導人為善擢周府奉祠  
正遷紀善居官直諫建文初改衡府教陳北征大計犯衆怒

不顧至是書訣其友解縉胡廣楊士奇江仲隆蕭用道死學  
舍初諸友約同死無一踐者惟是脩能不負矣年四十九陳  
瑛請追戮詔不問後楊士奇作傳語其子曰當時我死誰為  
爾父作傳聞者以為笑所著詩小序詩譜集義論語類編廣  
衍太極圖綱常懿範邇言家訓進思集芻蕘集觀感錄  
尹直曰或謂是脩居散地可以死可以無死乃獨勉行其  
志焉彼皆全軀保妻子方藉口管仲玄成欲圖後功以飾  
耻然則自靖自獻確乎是脩之素守食祿盡心大哉文  
皇之邱首嗚呼舍生取義是脩有矣



郭子章曰高宗夢帝齋良粥而得傳說建文帝夢異人授良藥而得紀善雖興亡不同而主臣遇合之跡良亦奇哉金陵不守之日假令紀善不雉何以見考陵懿文於地下至今文廟自經之帶來昂猶世藏之嗚呼亦蘊之節段之笏文之衣帶爭裂城中矣予獨怪國初全盛建文昭紀善有金風慘淡淒涼江山之句豈知燕之必興耶抑亦詩讖耶

何喬遠曰嗚呼君為社稷死則死之為社稷亡則亡之食焉而不避其難聖門之所不非也文帝即位遂捕建文

臣最嚴所不附已者合族誅夷士皆恐懼不敢遁唐楊士奇革親為革除帝辟擢皆自剪袂以至高位雖輔四君功業有所發明君子以此管仲而方孝孺之禍至波及同黨朋友歎百命以獨成其一忠跡未合於聖人是脩先身而死擇所而縊節不毀而完其家族其為明哲不遜大雅可謂善死居矣

殺徽州知府陳彥回彥回字士淵莆田人少坐累戍雲南值赦不及易姓名黃禮舉明經授保寧府訓導遷平江知縣守徽州政教一新疏復名氏奉命募民兵入援被執不屈



年四十七妻子給配

袁泰曰昔嵇康被僇而嵇紹卒為忠臣觀彥回之亡命變

易名姓有足哀者而卒以忠死其許身殉國素所蓄積也

豈彼富貴苟生忘親事仇者比哉

戊辰諸王群臣勸進

己巳燕王謁孝陵欵欵感慕攬轡回營諸王群臣備法駕

奉寶璽道迎遮擁登輦軍民夾道拜頌懽呼稱萬歲詣奉天

殿即皇帝位初建文時有道士謁於塗曰莫逐燕莫逐燕逐

燕日高飛高飛上帝畿已忽不見至是驗云

高成曰我成祖之興雖天命之有在亦人事所宜然者

建文君雖無大過然仁柔不斷事每牽於彌文太祖戰

以成一統之業群雄雖剪反側未安豈宜以蕩蕩之德臨

之哉非成祖之聖神文武兼創守而靖華夷則不有外

變必有內釁矣故迄今二百年海內得相安於無事者則

太祖開創之功成祖戡定之略並垂於不朽云至削奪

宗藩一事非盡出建文君意但不能自主斷遂聽人所

為迫釁孽既成形迫勢威則所謂騎虎之勢不得下耳國

初有言殺暹尚雷三十年未除豈其數當然耶乃成祖



謂陳瑛曰朕初舉義不過誅臣奸齊黃數輩餘人多有而用之彼貪其祿自盡其心又曰諸臣盡忠於忠於建文朕非惡盡忠於建文但惡其道誘建文變亂成法耳觀成祖此言豈深有藏怒宥怨於心哉使當時諸臣若能將順救正其間則方孝孺輩或不至受禍若是之慘也惜其不聞有一言之諫顧有獻讒諂如陳瑛者豈不可悲憐哉

復周王構齊王榑封國

夜月犯壘壁陣星又大星赤光自羽林軍流近濁

舊名  
庚午復洪武舊制革除建文紀年稱洪武三十五年復諸殿

朱鷺曰方文皇帝駐師金川門猶奉章 皇太后曰討

賊輔成王不得已來朝耳有如建文天子誠將吏且母用兵拒戰出九卿中官百數入城外雍然執旛御蓋以親王禮奉迎曰聞殿下欲法周公輔成王成敬速以入而天子身自衣冕臨朝設周公所負屐以待文皇帝且奈何勢不得引嫌自退而必且假手必且推刃以居天下之不韙幸哉不出此也遜去焉崩聞焉若虛位以須



文皇之至而文皇得異然有之而無所事湯武威豈非  
天相其間以善文皇帝之始與為文皇計宜召父兄  
百官而告以骨肉不幸之意曰既不獲遂予輔成王初志  
予敢以高皇帝天下付非其人予不得不立則為建文  
議謚議廟饗議脩實錄議封後綢繆委曲不勝哀悼之心  
而絕無快意一逞之跡足可有詞於天下萬世建文不失  
尊號文皇不失顯名豈不善終善始哉顧急予革除  
年號追廢天子此何為者是異姓仇讎相尅之所為而安  
在其為骨肉之不幸哉且何以解靖難也夫靖難執詞庶

幾天下之公義而卒疑於私則革除之為也况文皇帝  
正位之日亦既發喪治葬一如天子禮矣豈其生擅天子  
之尊死蒙天子之葬而史獨貶而稱君年獨削而不用耶  
以為建文不足存也皇明之一葉亦不足存耶我  
太祖場遜胡元再闢宇宙為古今盛王而今一傳剝蝕四祀  
無年實續而名絕之生榮而死辱之儼然正位華夷同仰  
既有年矣而一旦胥名實而剝滅之辟如白日正晝而欲  
掩為昏宵則誰能信且也高皇帝演沒後之年是死  
而生之也建文匿生前之號是生而死之也之死致生之



生致死不兩倒哉迹疑於私而事入於倒此忠臣義士之所浩歎而深惜非惜夫建文之不存而惜夫文皇帝雷日之舉之誤也嘗觀文皇帝發謀舉事往、遲疑於天命去留之際未之敢驟迫而後動不得已而後起上書則引祖訓執詞則誅罪人諭志則曰法周公其心固曰吾一不當而萬世之惡歸之也及至城門不攻而自啟主君不校而自亡何憤不雪何怒足留而又必革除之為快哉嗚呼豈謂文皇帝之聖也而德字若是其不寬宏耶當是時靖難諸臣必有挾淺薄之見肆殘刻之說以縱史

其間者采太宗問趙普後計對曰太祖已悞陛下豈容再悞太宗意遂決諸臣其少普之徒哉即如賊臣都御史陳瑛天下平定踰三時矣猶請追修建文臣賴文皇帝置弗問况乃更擅之際乎又何所不至哉竊謂革除之舉必非文皇帝意即有之必遺恨於在天之靈耳

王世貞曰今天下稱建文為革除年非也成祖即位詔稱今年仍以洪武三十五年為紀其改明年為永樂元年蓋猶秉踰年改元之禮不欲冒建文之號耳詔內第一款稱建文以來又慰諭臣民勅稱太祖賓天建文嗣位大



封功臣勅亦同又戒諭文武群臣勅詞建文不君蓋雖泯其尊稱未嘗削其年號也

復李諒中軍都督

辛未作皇帝親入之寶

進燕山中護衛為羽林前衛左右護衛為金吾左右衛俱親

軍指揮使司

刑部員外郎宋禮署禮部事廣西按察僉事汪泰為鴻臚寺

右少卿

故右軍左都督徐增壽追封武陽侯謚忠愍

夜水星犯積薪

壬申葬建文皇帝致祭輟朝三日上問翰林侍講王景

以喪禮對曰祭葬仍天子從之國子監博士歙縣黃彥清在

駙馬都尉梅殷軍中編素發喪私謚孝愍皇帝

談遷曰建文帝而在長陵何以置之曰不有生金之

賜即一力士任耳欲終為濠梁布衣而不可得也然則周

公輔成王義何居曰其弟與子之不免况其身乎高皇

帝謚元主為順而廟其世祖不忍以孫俘而歸之嗚呼

高帝之厚弗可及也僅一傳金陵故老無能指建文帝



整處非其跡易湮也史牒禪代沿例久矣孟氏所不盡信  
書耳

癸酉指揮使丘福未能鄭亨徐忠張武陳珪孟善李彬王忠  
火真陳賢李遠郭亮房寬徐理唐雲陳旭劉才俱為都督僉  
事王聰徐祥趙彛俱為都指揮使張輔陳志李濬張興王友  
俱都指揮同知孫巖房勝俱都指揮僉事故指揮使張玉譚  
淵贈都指揮同知  
浙江按察使祥符王良自焚於公署良字天性聞變收印及  
家屬焚死婦氏先投河死詔徙其族於邊良死後風雨晦

暝人見其出後官不敢處其宅以居

群忠事略曰當時簞食重臣死忠者良與鉄鉉之外無聞  
焉嗚呼良初以武穆自誓可謂允蹈其言矣

禮部右侍中兼尚賢司卿貴池黃觀投水死觀字澗伯初從  
許姓洪武辛未禮闈廷對俱第一授翰林脩撰歷尚賢司卿  
建文初遷禮部右侍郎屬足官制改右侍中仍兼尚賢卿北  
兵渡淮奉詔徵兵上游至安慶聞變哭曰吾婦有志節必不  
辱招魂江上明日報翁夫人給象奴翁持釵釧船奴市酒肴  
急携女沉通濟橋觀遂朝服投羅剎磯下族其家成姻黨百



餘人翁夫人投水時嘔血於通濟橋石中成小影陰雨則見之悽容宛然人咸異之後人移置侍中祠名曰血影石翰林院脩撰黃巖王叔英自經於廣德

魏國公徐輝祖召入不對下獄責狀第書鉄券文以上

王世貞曰當文皇之起兵而徐公其妃弟也亡論成敗之猶匿而公矢節故主即革命之際小一移志為曹公所為業以元舅居上公備心俯疇能易之公舍而恬然就死一何決也於建文為純臣於中山王為令子矣朱國禎曰北兵既起朝廷舍耿炳文李景隆以魏公為將

其可勝乎炳文老矣景隆驕汰安人其敗固宜公誠實一節人兵略難言與大英雄為對難之又難公之將而召選天成之也守死不移出自性定若公而肯為景隆貪元舅上公之尊則先與其弟合謀久矣至廖都督以功臣子收正學遺骸不免坐死孝莊先生罪與都督同又親正學之壻得終膺下是文皇之待中山友在正學士下母亦以世子郡王之歸公獨堅留爵高名高易勅人耳目且武陽屍分可憐恚其兄彌甚必欲盡之獄中耶嗟乎藩邸受困用兵三四年辛苦危迫謁陵痛哭恨何如幾敗得成大



泄其情信乎怨毒之於人甚矣哉  
錢士升曰書稱能罷不二心之臣保入王家而漢室帶礪  
之盟爰及苗裔與國同休勛戚尚矣况夫開國元功密受  
偶遭之命者予靖難師入正統攸歸以遜順天非若蕭牆  
之喋血也且代碎非若異姓之革命也且椒塗有覩天  
之妹為泐有釐降之姬誼託肺腑委蛇新朝不亦以功名  
終身而快、不忘所事身可幽名可榜爵可停而志必不  
可奪蓋親臣所處極難耳魯昭公之失國也叔昭子祈死  
君子以為義而友之司馬孚曰臣死之年固大魏之忠臣

也徐輝祖梅殷二臣亦云

甲戌戒諭群臣

都督僉事顧成為都督同知都指揮同知張信為都督僉事  
故都督僉事陳亨贈都督同知指揮使王真贈都指揮使  
命禮部定征子功

乙亥各處守城官及有司以次來朝

丁丑殺兵部尚書齊泰太常寺卿黃子澄文學博士方孝孺  
禮部尚書陳迪刑部尚書暴昭吏部左侍郎毛泰戶部左侍  
郎卓敬郭任盧迥禮部侍郎黃魁御史中丞練子寧大理



寺左少卿胡閏兵部侍郎盧植左拾遺戴德彛戶科給事中陳繼之兵科給事中韓永監察御史甘霖高翔戶部主事巨敬袁州知府楊任等籍其家妻女給配宗戚僇成有差凡奸黨皆如之戶科都給事中義烏龔太以非奸籍釋之太白投城死齊泰溧水人洪武丁卯解元歷禮兵部主事乙亥擢兵部右侍郎受顧命遂專軍事為北兵誅首走廣德逮入不屈黃子澄分宜人洪武己丑進士及第授翰林脩撰尋兼春坊官侍東宮累遷太常卿東宮即位兼翰林學士並議削藩後走太倉捕至不屈家僇六十五人成姻黨四百餘人

初子澄謫時攜子彥脩竄籍崑山及被戮彥脩解役至京收骸藏於焦山後塋於崑山之馬鞍山方孝孺字希直寧海人師事宋濂洪武中被薦召至京太祖曰此莊士當老其才用之遣歸杜門纂述後授漢中府教授蜀獻王聘為世子師建文帝召拜翰林學士遷侍講文學博士日備顧問預議削藩國亡孝孺裹絰日夜哭上數召之不至鎮撫伍雲繫以入上曰吾效周公輔成王何如對曰成王安在曰渠自焚死曰有成王之子在上少之曰有成王之弟在上語塞曰先生休矣促草詔孝孺擲筆哭罵不已上曰吾能



赤人九族對曰即死安能加族我乎行見後之叛備今日也  
下獄逮其宗戚相踵示之哭罵如故上怒命抉其吻剔其  
舌孝孺猶嘔血犯御座磔之至死乃己年四十六所著遜志  
齋集傳餘書佚僂宗戚一百七十三人遠戍不可勝計孝孺  
死叔克家子孝復戍寧夏慶遠衛洪熙初赦還其姓蓄鄭曉  
吾學編云單姓葉氏非也上海俞斌原竈籍販布寧海冒方  
氏竊改寧海縣志於典史溧水魏澤下摘去三行云匿幼子  
德宗託孝孺鄉人余學夔携於上海進士俞允孝家改俞姓  
鄉人葉瑛為置田宅求王世貞作復姓記纂歸宗錄至寧海

屢訟侵奪萬曆末浙江提學副使晉江王畿蘄水周延光讞  
斥之天啟四年方氏奏上事始定坐方氏黨死門人都督巢  
縣廖鏞太常寺少卿寧海盧原質監察御史寧海鄭公智河  
南布政司叅政歙縣鄭居貞解元長洲劉政為尤著鏞德  
慶侯權嬀子同弟銘拾孝孺遺骸塋聚寶門外山上尋逃去  
捕論家戍邊母湯和女也同銘女入浣衣局盧原質字希魯  
洪武戊辰進士及第授翰林編脩歷太常上召見不屈死  
鄭少智字叔貞力學好古工文詞建文初舉賢良為御史吏  
事精敏持法不阿論死戍其族鄭居貞洪武中舉明經歷禮



部郎中文行見重參政河南三年遷去吏民思之劉政字仲  
理建文元年舉應天鄉試第一考官方孝孺得而喜聞者孺  
不幸時屬疾頓足榻前嘔血死原質鄭公智鄭居貞俱族誅  
陳廸字景道宣城人世撫州百戶因家烏幼倜儻有志洪武  
乙卯貢士辟撫州訓導嘗代郡萬草壽表上覽而異之進  
翰林編脩陞侍講預脩大典轉山東布政左參議捕蝗弭盜  
乙亥擢雲南布政使平叛苗建文初拜禮部尚書辛巳二  
月進太子少保尋督餉於外聞變赴京召問抗聲指斥并收  
其子鳳山丹山等六人同磔於市罵加甚割鳳山等鼻舌醢

以食廸吐去大肆詬詈比死不輟聲其衣帶中詩三受天  
王顧命新山河帶礪此絲綸千秋公論明於日照徹區、不  
二臣又有五噫歌並悲烈成宗戚一百八十餘人幼子珠生  
五月乳母匿溝中得免被訐成登州暴昭山西浮山人建  
文中以刑部左侍郎充北平採訪使清節甚峻至是出亡被  
縛至抗罵命去齒截手足罵不絕口至斷頸毛泰浙人建  
文初吏部左侍郎教上方略被詰問不屈死卓欽字惟恭  
瑞安人洪武戊辰進士授給事中遇事敢言後改元士後復  
給事中進宗人府經歷尋擢戶部左侍郎建文初燕王入



朝寮請留之改封南昌以折禍萌至是逮入上曰是嘗建  
議搖朕者耶故曰日早從敬言 殿下安得至此 上怒欲  
殺之而憐其才下獄道衍嘗憾敬因曰使敬謀誠用 陛下  
寧有今日敬就死從容歎曰變起宗親略無規畫敬死有餘  
罪夷其族子孫有脫者流寓武康從外家姓宋氏 郭任丹  
徒人不屈就僂子經坐死少子金山保戍廣西三女給配  
盧迥仙居人貢太學 太祖微行觀燈聞書聲問何不往玩  
曰離親就學何暇之有明日召授戶部主事歷侍郎臨刑長  
誦而死 黃魁吉安人工文章習學故至是不屈死族死六

十三人 盧植

練子寧名安以字行新淦人洪武乙丑進士及第授翰林脩  
撰建文初擢吏部左侍郎改左副都御史辛巳改御史府中  
承至是不屈就僂李景隆脩憾力傾之遂族誅姻戚死百五  
十一人誦成文數百人所著金川玉屑集子寧妻秦氏有身  
生子成所名善慶洪熙初放還 胡閏字松友鄱陽人能詩  
博學洪武中薦授都督府經歷建文中遷右補闕進大理少  
卿遜國後召至不屈命脫其皮實以草至是滅其族子傳道  
併僂傳福方六歲充幼軍調交趾赦歸景泰四年年六十一



鰥而死少女入功臣家後釋歸以處子終凡與閭有連者俱  
死成戍邊者百人累死數千人村里為墟戴德彝奉化人  
洪武甲戌進士及第授翰林編脩進侍講改監察御史克舉  
其職建文中改左拾遺至是不屈死從弟德信德祐俱被禍  
京邸時詔使錄原籍德祐妻項氏燬其譜牒二子於外家掠  
拷至死不承得宥今二子之後蕃衍祭酒洵是也陳繼之  
莆田人建文庚辰進士授戶科給事中論北事多指斥又曰  
徐承福燕之至戚必有陰謀宜先事誅之不聽果開門降至  
是責問不屈磔死夷三族韓永西安人召見欲復其官曰

吾王蠲耳何以官為不屈死甘霖懷寧人洪武丁卯貢士  
授御史持正不阿被執從容就戮子孫相戒不仕高翔朝  
邑人重義槩有文學洪武中舉明經授御史上聞其名召  
翔將大用之翔衰經入哭聲徹殿廬夷翔族燬其先墓親黨  
三百人悉編戍巨敬平涼人洪武末為御史抗直敢言建  
文中改戶部主事克史官清慎有聲青問不屈死夷其族  
楊任嘉興人洪武間薦守袁州政多宜民以疾去黃子澄出  
奔至任家圖匡復俱擒至磔死族誅九十三人餘戍邊百餘  
家



群忠事略曰諸藩之釁秦實開之此罪之魁也然初以習  
知邊事受眷於高廟及後專聞外之事乃多失策嗚呼  
當國者若是欲無亡得乎幸其不屈而死差可人意耳  
許相卿曰中庸九經親、為太子澄不能引君當道而踵  
襲晁錯之遺謀狂謬又出其下遠甚誤國之罪萬死莫贖  
特以一死為不負其君焉爾黃子澄  
袁泰曰昔晁錯建議削諸侯卒有七國之變以建文之幼  
冲而削諸王封爵紛、變易多出齊黃之謀舉百萬之師  
付之一景隆其敗宜矣而特哀其忠於所事而踈於謀國

故特表為齊秦黃子澄

朱國禎曰北平兵起雖以齊黃為主名坐曰亂政曰奸臣  
且遵祖訓、兵待命夫復何詞然請以建文時勢籌之  
上承高皇之重下值親藩之強主父偃之策迂緩何及  
於事抑事有未易言者周王悍悖嘗棄國走鳳陽秦晉二  
王數以失德譴責甚至召還此皆孝慈親生子也當  
高皇時已恬不知畏何有於建文乃高皇可以父道謝  
建文不得不以君道臨何者高皇先天而天不違者也  
愚在外不在內草昧之基骨肉間義不勝恩建文後天而



天不可奉者也。患在內不在外。極重之勢。堂陞間。恩不掩義。而文皇以天挺之英名。則叔父強則幽燕威名既重。羽翼暗成。直馳皇道。其何能堪。重以告變紛、南之圖北。北之抗南。勢所必至。而勝敗存亡之機。已豫定於冥、之中矣。二公受建文知遇。泰既親承顧命。黃亦先有成言。畫策自當如此。若一主優容。人心難厭。究其陵夷。終於亡國。此在暗劣。如漢之桓靈。甘心受制。謂仁明之主。強力肯泯、為天下萬世笑。子君可逃、之不可死之臣。則盡心焉。盡命焉。又盡族焉。道如是止矣。若輕着口角。有悞國失策。

罪魁之語。此又與於陳瑛之甚者也。文皇亦且震怒焉。錢士升曰。齊黃以英銳之姿。處專信之地。謀弱藩。權僂力。天府所以居重。馭輕。強本幹之道也。卒至身夷族覆。毒流廟廷。良以偶國之慮太深。移封之事過激。舉動踈略。謀之不臧耳。夫王傅有割地之策。家令有削郡之奏。主父偃請推恩子弟。親屬畢侯。當是時。齊趙既分。吳楚亦滅。作左官之律。寢不悼之謀。夫三子固漢室之謀主也。為國家建長策。亦既效矣。議者或以為齊黃過不已。甚乎。惟是專閫重任。乃屬倚違。觀望之景隆。逮喪師懷二。而後請劔。尚方晚。



矣君子不能不致憾於太常也  
徐必達曰事莫重於綱常忠莫大於報主禍莫慘於殺身  
夫屬人骨肉之間見微知著不難以身發大難之端讀晁  
錯傳至今三尺孺子猶搯擊焉至於國破君亡身伏礎礪  
沫泗之間斷、為臣稱召忽之仁不哀其不然者即功如  
仲父直如魏徵千載而下謚為辱人况乎子為人奴妻為  
人妾九族陳屍六親流血無如建文死難諸臣又况乎親  
以及親友以及友數千百人咸輸城旦逮其子孫清勾不  
絕如建文諸臣親戚者其足傷悼豈勝道哉

袁袞曰昔管仲不死子糾王魏不死建成而卒以霸王之  
業顯然春秋不以召忽之死為非也方公雖得憐禍惡可  
少之哉文皇帝他日有曰彼食其祿自盡其心耳昭  
皇帝亦曰若方孝孺輩皆忠臣也大哉王言觀此則諸死  
難臣得失明矣袁袞曰方孝孺之於文皇湯武之夷齊  
也方孝孺  
王廷相曰方遜學忠之過者與要亦自激之甚致之忘身  
殉國一也從容就死不其善耶激而至於覆宗義固得矣  
如仁孝何哉輕重失宜聖人豈為之文山國亡被執數年



而後就死人孰非之哉

許相卿曰或謂李景隆壯伐孝孺實薦之建文帝雅相信重堅任景隆卒至喪師膏國而亡夫夷齊叩馬子路結纓志義烈矣然其處死從容成就一是而已孝孺深痛過激殲族糜軀古今死義未有慘毒若斯之甚者也悲夫乃後文廟言及孝孺輒憤頓足不能平當時瀆犯口語可想見矣

顧璘曰先生王者之佐於時以彼其才易服就列宜致卿相之位究厥謨猷顧豈與唐王魏者等先生不此之願悲

楚抗激至磔身沈族而氣不少回凡以存君臣之義為天下防也嗚呼忠哉抑有功於昭代深矣雖報卹闕然而遺文盛流斯固列聖之惠與

王世貞曰先王之學出於宋文憲不能如文憲之博而純則過之非孔孟之書弗讀非濂洛閩閩之學弗道而至一節之士如周孟橋楊雲啟孔璋輩津稱之不容口異日經濟之不盡究而以効命遂志終固其託寄樹立然也世之哀先生者或過有所褒飾然不失為志士而國史成於宣廟時似亦可以已矣而曰孝孺叩頭求哀命執之嗚呼



彼寧非叩頭者哉

何喬遠曰孝孺平生傑然必為君子也賤文章而貴道德  
耻刑法而尊教化慮無不發明聖訓敷陳王道當是時天  
下皆以孟軻韓愈復生亦自以遭遇時君當世無二奮然  
謂三代仁義禮樂為必不可師田必不可井閭必可比刑必可  
措何其勇也哉自待如彼其高過之如彼其信所著深慮  
治要官政民政諸篇誠救時之良藥惜乎好古太堅求治  
太銳欲以一人之身挽回數千年之世道狹小前人紛更  
高皇帝之制夫先王之道仁義禮樂莫大乎親、在廷諸

臣可以得建文君者宜莫孝孺若雖有善者無如之何  
哉建文君既亡斬衰晝夜哭觸犯嚴威刑七日乃亡宗族  
親戚朋友坐誅者千有餘人古今成仁之禍烈未加此也  
嗚呼文皇英武宏遠求士如饑渴今孝孺與三楊蹇夏  
諸人樹勲當時固將列彛鼎勒景鐘又今稍掩剛愎以存  
堂陛之詞亦可及身而止死者埒於市矣猶然轟雷霆赴  
水火如枕席其心有所必然也孝孺死浙東之仕於朝者  
以貞殉建文獨多於天下故夫行有勸而德有風孔子曰  
志士仁人其斯人與其斯人與



朱國禎曰方先生以聖門之學擅蘊氏之才高皇帝養之建文皇帝用之庶幾可與教化而遭時大阨退不得為巢由進不得為周召即求平世卿士不可得則有成其為方先生而已或訾以更改制度為無成或憐以激烈沉宗為太過噫太祖之制誠無可改也直易視乎以潤色太平為得意謂君臣千載一時不可失耳乃建文知遇如此謀人之國至於極敗不一明目張膽抗言之而暨付此身尺組刀圭間比於溝洫成何局面金陳和尚兵潰城破俟殺掠稍定然後出曰今日明白死後世必有知我

者一武夫立志猶爾何況先生凡忠臣孝子過大不幸之時之事一有顧瞻便生退轉則所謂叩頭乞餘生者何所不至而豈先生之本色哉

錢士升曰鉤黨之禍始於漢季聖朝方隆盛治而逆黨誅夷於前奸黨熾僂於後何其酷也夫不賞之疑浸而成逆猶可言也匹夫有志抗而稱奸則義士之扶去非乎希直之族益以游黨坐死幾及千人以視刊章捕治收考徧天下抑又甚矣程濟載讓皇遁蜀時夜聞人述諸臣慘死事泣然飲泣曰吾獲罪於神明矣諸人皆為我也傷哉言



乎

談遷曰方正學烈矣而議者謂其於建文無稍濟雖死於古紛紛更制未盡正學意也道所忍人也郊送文皇於北平首請全正學自有深服其心者匪獨以文矣文皇方藉口周公而成王之子成王之弟二語無解於天下萬世其威加十族溢於常典而不能折南史之簡則以成敗論者舛也

群忠事略曰陳迪雖以文學進觀其履履蓋有用之學也及進位公卿用違其才且益晚矣其死也猶激烈炳烺不

下方孝孺云陳迪

馮時可曰陳公以布衣游至宮保過亦隆矣當靖難初抗詞不屈遂致赤族豫讓國士之報亡媿哉陳迪

許相卿曰敬有高世之才未及大展立朝慷慨英偉多所建明於天文地理律曆兵刑靡不精究尤邃性理之學詩詞宏壯為文精神峭拔磊落如其為人文皇自潛邸知其名死猶惜之曰國家養士三十年卓敬可謂不負君矣卓敬

焦竑曰天步初夷屬搶攘而未定故人懷靡常舍神聖其



莫屬斯時也以高帝之子續承高帝之緒以高帝  
之略寵夷高帝之人新命舊邦非逐鹿之可擬子燕孫  
詔豈瞻烏之靡定公即準管魏之操撫鐘簷而自怡其與  
更二姓事二君者當異日談也顧刀環築口吠先之語不  
輟戟枝入頸送徃之情彌厲臧洪同日誓不俱生卞壹一  
門幾無噍類豈不痛哉於乎方黃之死事非不烈也而石  
畫無聞胡解之委身非不智也而顯名俛失前有曲突之  
謀後無啣璧之辱奮一時而起千祀者其惟公乎卓敬  
葉燦曰公負環瑋杰特之才為一代經綸大手是時宗子

無維城之助諸藩有猜忌之嫌方正學擔板而不通齊黃  
輩削奪以激變而公獨建議徙燕於南昌是真善處人骨  
肉之間而委曲調劑卓然為安邦定國之長策使公之議  
得行則隙不開難不作可以無壬午之事矣惜其不用而  
公止有一死耳公死國樂清樵夫死公所以死雖不同其  
心一也

朱國禎曰卓公為建文效死忠義不必言然最初論諸王  
服飾當辨後言燕當徙封又究心周邵理教之學此其學  
問識力青田之後一人乃姚少師以舊怨激使必殺夫當



日迎則生不迎則死公之死計乃決。文皇自然不容即委曲宣諭必抗必死何藉於激少師智人也。固憐於方正學矣何獨於卓縕此心多此口人不可無學、儒則仁義學釋則慈悲少師所學何事佐。文皇取天下誅殺慘夷既不能救又益薪焉即溥洽之請亦在屬縕之時豈慈心至此始發抑恩怨太重英雄本色固然。文皇又可逢不可拂湊成此殺運耶。

陳德文曰王蠋龔勝非不死不託孤膺寄採薇積餓從容引決子寧固親信誼均休戚不得同日語也恒言烈士殉

名練子寧豈殉名者抑仲尼所稱求仁得仁者非耶。高皇帝聖性嚴重子寧布衣慷慨犯之今其言固在也非見定於素哉夫士無直言敢諫必不仗義守節子寧蓋臨難無苟免者死重於太山矣。練子寧。

朱國禎曰吾讀浩然堂記深感死事者其忠同其時勢之遲速不得不異也文山一逃於京口再逃於空坑因燕三年從容就死疊山居冢已久徵入燕不食死其室家皆亡恙黃練諸公一日并命又盡其族此豈文謝之遲留黃練之勇決而。文皇之至仁大聖反不如元祖之寬厚哉元



以全力舉宋得其降臣甚衆狎之亦太甚所不能降者獨  
此兩人耳必欲降之故用緩法文山亦時志在興復必  
死為期必報主為快一日可三年可十年亦可乃若文  
皇則異於是孤軍渡江縱其將士甚衆疑之亦太甚所  
不可緩者獨此數人耳且舊主已出諸人走廣德走吳  
中走海工謂何宜其用亟法若不能一日待一人留也善  
哉乎時為之斯其稱浩然字而諫死者又當別論已總論  
趙時春曰靈臺以巨故加祖俗傳巨御史今江南諸野史  
作戶部主事平涼人豈御史九年考績遂及於難而鄉人

仍稱故官也與其曰平涼人抑以縣名未彰故稱郡耳  
史桂芳曰胡閏子傳福方六歲克幼軍調交趾赦歸景泰  
四年年六十一鰥而死此豈章惇所為哉母亦胡公數  
之窮耶不然天以完節付巡遠天下為重一族為輕萬世  
為重一生為輕南安詩云忘公人是愛公人信矣哉胡閏  
妣涑曰涑自史館始知戴公之大節訪諸邑人類不能舉  
其概求之郡志則佚而不傳惟科貢考僅列公名而又失  
其實按洪武二十七年及第首足海張信而第三人則公  
也公官編脩侍講中丞御史及左拾遺者繼世更定之制



也。先皇之簡拔嗣君之所錄用其文學風誼固已見推  
於當世矣。北兵南下長江不守公以身殉義禍延宗黨此  
公死事之跡也。文皇興靖難之師固非常情之所仰測  
一時諸臣莫不違權通變保其榮祿悔吝不及獨公若逆  
天命拂人情至於嚴誅而不悔豈味趨避於其間哉。蓋人  
各有心有所可必有所不可有所能必有所不能壬午之  
死固公之謂可而亦其自以為能者又安得有他顧哉。德  
彛

談遷曰：韋朝之變學始叔姪古未有也。凡彼剛士概曰奸

黨銷英風而劇義概。聖祖顯忠之報益有藉焉。繇此而

往僅隄二十年蹇夏又為齊黃矣。尤而效之無一人殉其  
節。宮商和而桴鼓應上所漸磨然也。噫。聖祖優仇讎之

買的而今不能容至親之三王。聖祖全漠北之子英而

今不能宥奸籍之姻黨。聖祖謚異類之順帝而今至廢

骨肉之建文。聖祖脩既亡之元史而今且韋代傳之年

號作述相懸何啻霄壤哉。雖天威叵測而道衍陳瑛輩揚

瀾益薪能毋烈乎。總論

上得建文時所上策悉火之。或言建文所用之人宜斥不聽



新作奉天殿

製皇帝奉天之寶制誥之寶勅命之寶

夜二大星青赤光自天倉流土司空

戊寅遣安王楹告懿文太子遷其主於陵園除興宗孝康

談遷曰出帝有茹肝涉血之嫌其追廢庶人宜也孝

康皇帝夙詎不薄即被一虛號於在天亦何溢之有必曰

悉遵先命則燕之不為燕也高皇帝亦曷能禁之

無錫知縣韓約為知州

已卯翰林院脩撰黃巖王叔英自經於廣德叔英字原采力

學尚風節辟居仙訓導丁丑改德安府學權知漢陽縣有善

政建文初拜脩撰工資治七策預脩實錄奉命募兵至廣德

聞變自經玄妙觀之銀杏樹其絕命詞曰人生穹壤間忠孝

貴克全嗟予事君父自省多過愆有志未及竟奇疾忽見纏

肥甘空在案對之不能嚙意者造化神有命歸九泉嘗念夷

與齊餓死首陽嶺周粟豈不佳所見良獨偏高蹤邈難繼耦

爾無足傳千秋史官筆慎勿稱希賢又題其几曰生既久矣

未有補於當時死亦徒然庶無慚於後世年三十陳瑛籍

其家妻金氏已自經二女赴井死所著靜學齋稿多散逸道



士咸希年收莖城西  
不黃佐曰先生與正學先生生常興運懷經綸之志然卒皆  
不究厥志殉義以死悲夫嘗聞太孫聰明好古篤信儒  
術欲以周官致治竟失天下適死果天命然乎抑人事也  
予於是益感君臣相遇之難又信祖法之未可輕議也讀  
先生貽正學書為三復流涕者久之嗚呼識慮遠哉王叔  
錢士升曰臣嘗讀史至袁粲以劉宋祚衰陰謀反正及文  
信公身遘故運方圖興復本朝徵兵江上事雖不成未嘗  
不哀其志嘆天命不可以力爭也當靖難時以天下全勢

不能當一國之師迨賢極已移雖百侍中輩噬臍何及且  
淮南殘旅缺鉉梅殷輩猶不能枝柱况其他耶二子班同  
侍從又非素負韜鈴者流一旦遭逼國難抗義徵募不得  
則以死繼之使袁文有知相從地下不其烈乎夫江流浩  
汗彭咸所居古院幽深仙真所宅謂二子至今未死可也  
黃觀王叔英

夜大星赤光燭地白帛度流天市垣一小星隨之  
庚辰釋清遠衛卒羅義獄擢戶科給事中  
駙馬都尉總兵官梅殷入朝京師偕殷尚擁兵淮上圖興復



上迫公主招殷公主嚙指血為書達之殷得書慟哭聞出  
奔曰君存與存君亡與亡吾姑俟之乃還京 上曰駙馬勞  
苦殷曰勞而無功 上默然

朱國禎曰北平師起中朝用兵其籌畫於內者俱不必言  
而僂力於外稱知兵善戰者莫如鉄尚書持重有威望者  
莫如梅駙馬而威庸平安輩亦皆良將可以立功者惜天  
命已去智不及謀勇不及決即傳監二公尚在付之大兵  
不走即降何況駙馬雖不即死其曰君存與存意念深切  
朝對之語極中事情婉而實充嚴主心媿當亦霽威公主

遺書及牽衣之哭一時見憚居然烈夫夫之風若駙馬者  
無耿李之敗甘深曦之沉真不負建文可以下報太祖矣  
七月午朔大祀天地於南郊還御奉天殿告即位詔曰昔我

皇考太祖高皇帝龍飛淮甸汛掃區宇東抵虞淵西踰崑崙  
南跨南交北際瀚海仁風義聲震盪六合煦爽闇昧咸際光  
明三十年間九有寧謐宴駕之日萬方嗟悼煌煌功業恢於  
湯武德澤廣布至仁彌流少主以幼冲之資嗣守大業秉心  
不順崇信奸回改更成憲戕害諸王放斥師保委政宦豎淫  
佚無度天變於上而不畏地震於下而不懼災延承天而文



其過蝗飛蔽天而不脩德禍機四發將及於朕朕為高皇  
嫡子祖有明訓朝無正臣內有奸惡王得興兵討之朕遵  
奉條章舉兵以清君側之惡蓋出於不得已也使朕兵不舉  
天下亦將有聲罪而攻之者少主曾不躬自責肆行旅拒朕  
荷天地祖宗之靈戰勝攻克擣之於壩上殲之於白溝破之  
於滄州潰之於薈城蹙之於大河鞠之於靈壁六戰而已不  
用朕於是駐師畿甸索其奸回庶幾周公輔成王之誼而乃  
不究朕懷闔宮自焚自絕於宗社天地所不庇鬼神所不容  
事不可止朕乃整師入京秋毫無犯諸王大臣謂朕太祖

之嫡順天應人天位不可以久虛神器不可以無主上章勸  
進朕拒之再三而不獲乃俯徇輿情於六月十七日即皇帝  
位所有合行庶政並宜兼舉仍以洪武三十五年為紀其改  
明年為永樂元年建文以來祖宗成法有更改者仍復舊  
制云於戲文帝入漢尚資恭儉之風武王紹周願廣化  
布告天下其體朕懷詔至臨海有二樵人鬻薪聞人語曰新  
天子即位矣二樵人瞻視久之舍擔相抱慟哭投東湖死  
初楚人刑部郎中柳一景蘓人太學生王志以請誅李景隆  
不聽道居東湖日負薪入市日不二價至是並死漳州府教



授茂名陳思賢聞詔至曰明倫正在今日率諸生伍性原陳  
應宗林珏鄒君默曾廷瑞呂賢為舊君位哭臨如儀郡人執  
思賢入京死之諸生皆以身殉

高青亨曰嗚呼樵夫其採薇之徒與死於樵可以媿夫不  
死於官者矣革除之變吾台死義者凡四人樵夫無與焉  
而其事傳其不傳者又未可知也傳不傳樵夫無與焉故  
曰採薇之徒也東湖樵夫

群忠事略曰儒官之秩雖卑實任綱常之重陳君之從容  
盡道且能使諸生駢首就死而不悔非其師友平日講之

素明守之素定何以能此嗚呼孰謂海邦遠僻而有臨大

節植綱常若斯人者耶意是可尚已

癸未脩周齊二郡

命禮部鑄諸司舊印

湖廣行都司都指揮同知薛鵬為河南都指揮使都督僉事

徐義為都督同知鎮守兗州

福建都指揮使鄭祥為右軍都督僉事

召前北平按察使陳瑛為都察院左副都御史瑛性殘刻怨  
革朝甚深暨入朝曰不以叛逆處彼則我輩何名舉朝大吏



俱不答瑛遂決意泄忿一日閹傳建文帝尚在與諸通臣  
圖復瑛密奏方孝孺黃子澄諸家門生故吏結黨可慮宜下  
令捕之正犯論磔妻子流二千里家產沒入庶無後艱上  
惑之命瑛便宜行事恣意羅織給壓刑部大理諸臣殺身外  
且錄九族外親以至外親之外親師友交游復字相通即誣  
奸黨蔓延十族村里為墟

甲申享太廟

吏部請復建文中改官如洪武舊從之  
夜大星二一赤自紫微西藩流文昌一流雲中

乙酉禁執無辜入幸賞者抵罪

設靖江府諮議所一記室一俱從七品

右軍都督僉事鄭祥克總兵官鎮守雲南雲南左副總兵盧  
旺都指揮僉事歐慶克左右副總兵

都指揮使何清往浙直整兵撫民

復翰林院待書黃淮為善劉彥銘鄒進吳均唐恕王璠吳勝  
鮑麟為中書舍人

禮部左侍郎兼翰林學士董倫致仕尋卒倫字晏常恩縣人  
家宛平國初辟右春坊右贊善大夫直東宮進左春坊大學



壬申改河南左叅議蓋心民事丁丑誣誤免官典教雲南  
建文初召至拜令官屢言當務親睦不聽年七十勒罷出  
京悒、數日卒

袁泰曰昔魏徵曰願為良臣不願為忠臣有以哉董公以  
甘盤之舊建文中復赴宣室之召從容清禁壽考令終不  
與齊黃之難將不得為良臣乎哉

夜大星青白光自帝座旁流紫微西籬又大星赤光自一穀  
流五車

丙戌改謚湘戾王曰獻

翰林侍講王景為學士吳府甯理副楊士奇為編脩

丁亥復各道監察御史

復泗州宿州山川壇籍田祠祭署其南郊祠祭署定為郊壇

祠祭署鐘山祠祭署不可罷

夜大星赤白光自天市西垣流心宿

戊子祭太社太稷

夜月入氐宿大星赤光自宗星南流天市東垣

辛卯儒士曾日章為翰林侍讀國子助教鄒緝為侍講給事

中金幼孜王洪桐城知縣胡儼並改檢討



殺刑部尚書侯泰蘓州知府姚善泰南和人時督運淮安赴  
闕至高郵被執不屈死妻配象奴弟故祖子祀皆論死姚  
善字克一初姓李復氏姚安陸人洪武中貢士授祁門丞進  
廬州同知歷重慶守蘓州咸有能聲卹民下士禮重俞貞木  
錢芹有古循吏風時奉詔兼督蘓松常鎮嘉興兵勦王朱戰  
縛至磔死年四十三子節成賀縣千戶所幼子繼見隨母給  
配旗手衛指揮張旭家保兒項見送工部習匠善友人禮科  
左給事中常熟黃鉞憂居閭其死起登琴川橋哭祭投水死  
鉞字叔揚入太學任宜章典史建文己卯舉湖廣鄉試明年

庚辰成進士授刑科廉戶禮科左給事善勸王招鉞鉞俟整  
父徃俞貞木勸善勸王亦坐死

袁宏曰予童子時數聞長老言姚公之治蘓勤卹民隱而  
教之以禮其消息因革皆可施永久昔子賤治單父夫子  
問之對曰不齊所師事者三人有賢於不齊者五人皆敬  
事之夫子歎曰惜哉不齊之所治者小也觀姚公之禮遇  
賢者雖子賤何以過革除間壯兵長驅諸郡望風降迎惟  
恐後獨公以蘓州底節不下伏劔而死忠義之名施乎亡  
窮卒賴得士之助彼井蛙之徒志驕氣滿視下交如辱聞



姚公之風可以媿矣姚善  
楊儀曰叔揚克一之死均為忠也然克一受命於君舉義  
師不能成功卒為麾下所縛身死族夷此君子之所優為  
也若叔揚之死則屢絕而復食頃臾以待克一事定然後  
從容致身以成其義孝不遺其親忠不後其君信不忘其  
友而又不紆以偷生不棘以蔓禍其賢於人遠矣哉黃鉞  
王世貞曰事固不可論以建文之亡而士大夫爭先而為  
故主死者若饑之就食而渴之就涼豈所謂殺身成仁志  
士之分而手足腹心亦報施之常烈叔揚其沒者固顏

然而付清波而其不沒者尚凜然而傲秋霜也耶黃鉞

劉鳳曰士守經義儒衣冠道先王語其雍容醞藉可也及  
事變起能奮難不忘死亦良難哉仲理未食其食徒以受  
國士知於孝孺遂以身殉叔揚有隕無二為臣之節是其  
庶乎方國家始建威德遂盛海內忠義之臣接踵而死湮  
滅無所復志者多矣故其事皆不得而詳焉至匡山澤易  
姓名隱約以終身此其人豈有所要於後哉名不名無預  
也而明教化以著統風勵來者是以貴君子表微乎

壬辰召代王桂



鑄司禮出監入精微印

癸巳改封懿文皇太子次子吳王允熲為廣澤王國漳州  
衛王允燧為懷恩王國建昌徐王允熾為敷惠王隨母呂氏  
居懿文陵

談遷曰漢祖脩怨有禹羨之封文皇改封懿文子顧名  
思義殆同降叛禍端見矣覆巢之下寧有完卵耶

甲午裁河北都司湖廣行都司

乙未軍都督僉事趙清往中都整兵撫民

定來朝文武官賞格

夜木星退犯東咸又大星青赤光白壘壁陣流北落師門

丙申告即位於先陵及歷代帝王陵闕里嶽鎮海瀆之神

諭前軍左都督李增枝整兵荊州節制荊州襄陽瞿唐安陸

諸衛

諭兵部榜諭軍民安業入城之日市不易肆今豈監及無辜

有誰衆者罪之

夜月犯壘壁陣星又大星青白光自崇正流游氣二小星隨

之

丁酉賜谷王穗樂三奏衛士三百金銀槍大劔黃金三百白



金三千綵幣三百匹鈔三百錠馬四匹金籠鞍轡二副歲增米三千石

戊戌大理寺辦事官虞文達為四川道監察御史山東撫民主簿周觀政為江西按察使前海鹽典史史國用為山東按察僉事俱御史被斥者

吏部請繩罪吏上以既赦悉除之

復瀋陽左右二衛

昏刻大星青白光流西班

己亥楚王還國

翰林待詔解縉為侍讀脩撰胡濙為侍講編脩楊溥楊榮為

脩撰檢討鄭好義為編脩太平府訓導蕭引高為檢討應天

訓導王汝玉蕪湖訓導張伯穎為五經博士特改子榮名榮

庚子太白晝見夜大星青白光燭地自天倉流近濁金星入

太微垣右掖門月犯天囷星

辛丑勅諭將士曰朕舉兵靖難爾輩多功所司上狀未詳故

未即賞昔中山王從高皇帝混一天下二年後方賞今踰

月爾輒憤後時不已急事向在兵間小捷必報豈當大定乃

遂忽諸業勅所司亟上悞許陳改



工朝罷顧近臣太息曰如散官一事前代沿久何建文改之也於是愴然色變進吏部尚書張統戶部尚書王純曰卿二人皆老矣令解秩月給半俸居京師統出自經部之後堂統字昭季富平人舉明經授東宮侍書才識通敏進通政司左叅議尋拜雲南右叅政進左布政使時六詔初定凡貢賦法制悉統裁定秩滿入覲勅勞之建文初進吏部尚書滇人戀慕如失乳在銓識鑿精絕士類相慶至是因散官被詰懼甚所著顯庵集吏部左侍郎毛泰亦死

純輩則遠矣

宋國禎曰張公之死說者不一或曰聞文皇即位自堂

上投於地痛哭徹晝夜泪盡繼之以血迨晚竟自縊一日

投鍾山龍潭妻與二妾四子家僮皆從而誓者則曰文

皇以改散官事詰責慙懼自縊又云謁太宗受勅慰諭

最後自縊不宜與方錢諸公同故公死在文皇即位後

三十四日後之十六日則前二說似描寫太過不可信最

後賜勅或者通行朝臣非止一人惟散官之詰理或有之

似與烈死道死者異然公之縊差十七日與董倫賜罷同



日倫出城數日方死尚在可憐當收入建文遺臣中公又  
先之以大臣不容於新朝即可以見故主分表忠一席非  
過也

談遷曰國史凡殉難諸臣不甚稱述於張冢宰又亡論矣  
俛仰新朝終不自安雉經官舍亦不遠之復其文學政事  
卓然有可紀者寧肯覩焉辱其身哉其稍失之需忍者或  
微有所待耶

壬寅補賜諸王樂戶

癸卯左都督袁宇往四川雲南整兵撫民俟事畢即鎮守雲

南江陰侯吳高往河南陝西整兵撫民俟事畢即鎮守陝西

甲辰命前工部尚書嚴震直致仕戶部尚書王純應天府尹

薛正言等分往山西山東河南陝西巡視民瘼

復牧馬千戶所

乙巳賜諸王黃金百白金千綵段四十錦十紗羅各二十鈔

五千錠

丙午諭都督陳桂等輔導皇長子居守北平

吏部右侍郎襄義為左侍郎即中陳洽為右侍郎戶部右侍郎  
即夏原吉為左侍郎兵部右侍郎古朴改戶部署禮部事員



外郎宋禮為右侍郎兵部郎中方賓為右侍郎工部尚書鄭  
賜改刑部湖廣按察使黃信為都察院右副都御史河南按  
察僉事劉翥俞士吉為左右僉都御史楊得安為右僉都御  
史

復前戶部尚書郁新工部右侍郎黃福官宥湖廣按察僉事  
朱吉為中書舍人湖廣布政司 參議李至剛為右通政時  
皆坐累繫獄

丁未申明天下誦讀大誥三篇  
戊申諭兵部惟軍機給驛餘並止

舞陽人王忠等作亂南陽衛指揮王真破擒之

己酉遣給事中闕天下逃軍補伍

監生莊重何淮謝朝錫傳善為試給事中曹兵科淮朝錫刑  
科善工科

神策衛知事羅文貴陸悅龍江右衛知事柴履監生唐友成

陳夷鍾永用黃禮楊善安徐儉王敏張潛吳閻沈懋胡亨李

敏為監察御史

八 胡子朔頒詔朝鮮

後軍都督同知陳用都督僉事曹遠署山西行都司事左軍



都督劉貞鎮守遼東

夜大星青白光燭地自奎宿流近濁

癸丑天下者民來朝懼妨獲諭禮部即止之

甲寅求民間識字婦女充內職年三十至四十女子年十七

工者

以鳳陽淮安等官牛給北平山東河南

丁巳遣官釋奠先師

戶部上天下中鹽虔命金蓋楚雄四川鹽井衛陝西甘州衛

勿停餘悉停之

戊午祭太社太稷

中書舍人黃淮為翰林編脩

遣使詔諭覺靈藏烏思藏必力工瓦思達藏朵思尼八速刺

等處

寧王權求居杭州不許命於建寧荊州重慶東昌擇之

夜大星青白光自尾宿流雲中

己未封周府有勳汝南王有烜順王有燭祥符王有熹新安

王有先永寧王有煇汝陽王有燿鎮平王有煇宜陽王齊府

賢燧樂安王賢燧長山王賢燧平原王



召秦王尚炳  
右軍左都督何福為征十前將軍總兵官往鎮陝西寧夏節  
制陝西山西河南官軍右軍都督同知韓觀往江西練兵廣  
東福建湖廣聽節制  
定罪人輸作例

庚申復北平右布政使曹昱官

監生丁琰姚山林從李晟俱為給事中  
壬戌代王桂及世子遜端來朝壬申還國  
岷王棟奏西平侯沐晟媒孽狀上書諭王曰嘗聞皇考

遺訓年二十五尚未誕嗣沐英甫八歲皇妣鞠之後命復  
姓封侯控御蠻夷十餘年來朕無南顧憂者以英在也今晟  
所為鹵莽信奸邪以犯吾弟固不可宥但念乃父開疆不忍  
罪之况雲南重地安邊撫夷非賴世臣其何以能苟不改過  
罪之未晚吾弟亦宜念監學之親置之度外又諭晟宜篤親  
以消舊怨

徐學謨曰臣觀文皇帝諭岷莊王語知沐氏有大勛於  
國家即以親弟之奏不忍加法非以日南之所倚重者乎  
頃歲裔孫凌犯按臣鞠之幾置大辟朝議竟從輕譴有以



也岷國武岡始以邊地請徙特辭常祿行糧俸給一千五百石再國以貧故代多賢胤孔子曰以約失之者鮮矣善

夫  
定十一月朔進大統曆

四川行都司都指揮同知程達為前軍都督僉事仍鎮守

癸亥晉王濟燾來朝  
衍聖公孔鑑卒

復設建陽衛杭州前衛  
甲子西平侯沐晟鎮守雲南

定罪人輸粟北平自贖

廬陵人作亂守臣請兵上曰此不足患遣行人許子謨教

諭之仍勅都督韓觀招撫

夜金星八角宿又大星青白光自牛宿流天市東垣一小星

隨之

丙寅昭德王濟燾來朝

定賞功格

工得建文時奏章千餘道使翰林侍讀學士解縉等閱其干犯者悉燬之既從容問爾等皆宜有衆未對脩撰李貫進曰



臣實無上曰爾謂無忠耶朕非惡盡心建文者惡其導之  
壞祖法耳事建文忠建文事朕忠朕不必曲為覆  
殺御史大夫真寧耿清清洪武甲戌進士及第授翰林編脩  
丁丑春命署都察院左僉都御史誥誤下獄尋宥之出巡茶  
川陝建文初擢左都御史改北平布政司叅議往察燕起居  
燕王甚稱之還臺改御史大夫至是知讓帝出亡猶思  
興復詭自附上喜曰吾故人也厚遇之仍其官因伏利刃  
於衣衽中是日早朝清緋衣入先是靈臺奏文曲犯帝座甚  
急色赤上見清衣緋命左右搜之得利刃詰之曰欲為故

主報仇耳遂醜詆上武士挾其齒含血噴御袍命剝其膚  
草實之械繫長安門其夕精英迭見後駕過屍所怨索斷直  
前數步若犯駕狀乃火之已夢清仗劍追繞御座覺曰清猶  
為屬耶命赤其族籍其鄉轉相攀染曰瓜蔓抄清姊適劉國  
國兄固授山東青州教諭養母同依清京師並遇害固子起  
年十五臨刑一怒縛斷奪刀連殺十餘人被磔固字永貞年  
三十六耿清報籍訛為景崇禎己巳有神降於北南京大理  
寺卿徐良彥官舍詢之曰劉固因著幽忠記  
袁袁曰耿公慕豫讓之美袁劍以朝盡心焉耳矣成不成



豈足計哉

錢士升曰 文皇天授神武起而踐阼且又 高皇帝子也 以清伉節死故主難足以報矣乃欲效漸離子房輩得一當以快所懷來至於骨盡皮懸英靈激動嗚呼方其說附新運賜絕九迴緋衣之變上通天象豈偶也哉豫讓不云乎既已臣而求刺之是二心也然而勢殊隔代義屬一家清以其身委蛇班僚迹類解揚而志圖刺聶亦或一道也不然覲顏異姓身污逆名即幸而事成豈能洗失節之辱哉

談遷曰齊黃方練之慘千載下為之魂悸而耿清託於專聶犯雷霆所不及料其事必無成也徒以矢報無地出於九死俾 英主且忿且疑畢世不解胡濙久使鄭和遠泛俱蓄慮使然也嗟乎耿清優於荆卿漸離多矣 錢士升曰耿公懷七劉仙降乩耿疑詭劉疑誕其實不也 夫人旁薄宇宙惟此精神耳精神一真正行旁行皆足千古入無入有直窮三界是以俠客入秦著白虹貫日之象真君岳錄昭洞見忠孝之文此皆節烈之鬱思游魂之精爽而猥謂劔術為不祥搜神為志怪不其困與



戊辰夜月犯天囷星入大星赤光自五車流參宿火星犯太  
微西垣上將星  
己巳許逃軍自首赴京立功贖罪  
庚午初寧夏總兵官左都督何福曰欽天監言火星犯上將  
爾為將禦邊宜慎之母忘

右軍都督陳暉往江西參韓觀軍事

夜月犯畢宿

殺御史府右副都御史秦興第大方大方博學能詩文舉儒  
士授淮安教授入朝召對稱旨擢秦府長史制詞勉以董仲

舒顏其堂希董建文中副院至是不屈死三子並遇害妻張

氏下教坊所著希董集五卷行世

壬申命濟熿居平陽

癸酉夜大星青白自雲中流近濁

甲戌高煦還北平

夜大星入太微垣右掖門

乙亥大星赤光自雲中流近濁

丙子指揮施文守泗州

前慈府長史金忠為工部右侍郎



靖江王府諮議所改長史司

蠲應天太平鎮江寧國廣德今年赴役京師

丁丑詔諭和林瓦剌等處諸部酋長

命撫淮安永平北平河間流民復業者

戊寅水軍右衛指揮僉事宣信為前軍都督僉事

己卯柳州等處蠻不靖遣禮部員外郎李宗輔等勅諭之

夜大星青白光自外屏流壘壁陣又星赤光自內屏流近濁

又有星自紫微西藩流近濁

九朝已朔肅王模來朝

戶部郎中李昶撫安北平郡縣

夜大星青白光自土司空旁流雲中火星流右執法

壬午蜀王椿來朝秦王尚炳至

癸未晉王還國

湖廣布政司左右叅政郭燧王麟按察副使聞良輔僉事陳

晟蔣賓興鄒脩張敏俱有罪降行人

夜金星入氏宿

甲申封秦府尚炳興平王尚炳永壽王尚炳安定王晉府昭

德王濟熿改平陽王濟熿廣昌王



大封靖難功臣中軍左都督兵福淇國公祿二千五百石都督僉事朱能為中軍左都督成國公祿二千二百石都督僉事張武為中軍都督同知成陽侯祿千五百石陳瑋為後軍都督同知秦寧侯祿千二百石鄭亨為中軍左都督武安侯祿千五百石孟善為右軍都督同知武定侯祿千二百石火真為中軍都督僉事同安侯祿千五百石右都督顧成鎮遠侯都督僉事王忠為右軍都督同知靖安侯祿千石都指揮使王聰為中軍都督僉事武城侯祿千五百石都督僉事徐忠為前軍左都督永康侯祿千一百石都督僉事張信隆平

侯李遠為中軍都督同知安平侯並祿千石郭亮為左軍都督同知安成侯祿千二百石隆平安平安俱世伯都督僉事房寬封思恩侯祿八百石世指揮使都指揮使徐祥封興安伯祿千石世爵都督僉事徐理封武原伯都指揮同知李濬襄城伯張輔信安伯都督僉事唐雲新昌伯世指揮使故都指揮同知譚淵子忠新寧伯都指揮僉事孫巖應城伯房勝富昌伯世指揮使趙彝忻城伯都督僉事陳旭雲陽伯並祿千石劉才廣恩伯祿九百石世指揮同知進李景隆太子太師曹國公祿四千石茹瑞太子少保兼兵部尚書封忠誠伯



祿千石都督同知王佐為中軍都督同知順昌伯陳瑄為右  
軍都督同知平江伯駙馬都尉王寧永春侯益祿千石  
王世貞曰靖難諸將臣從藩邸起以旅之師殫九之地出  
萬死者三載而遂安定宗社於太山之固此其績誠巨然  
英主實在軍攻堅履危斷自神授又大戰不過十餘所  
定軍府不過三四而已毋論中山開平其視曹衛宋穎而  
下抑何徑庭也今高帝之盟白馬指黃河而誓其功臣  
鮮有存者易世而後所當僅如綫之上與雀符之盜鹵級  
數十以至百積封自伯以至侯遂有公者今胡也貂錦蟬

聯也以此况彼誠不可同年而語矣

故都督同知張玉追封榮國公謚忠顯故後軍都督僉事陳  
亨追封涇國公謚忠勇故都指揮使譚淵追封崇安侯謚壯

節

吏部左侍郎蹇義為尚書右侍郎陳洽為左<sup>侍</sup>部左侍郎  
夏原吉為尚書右侍郎古朴為左侍郎兵部左侍郎劉儁為  
尚書右侍郎方賓為左侍郎禮部右侍郎宋禮為左侍郎工  
部右侍郎黃福為左侍郎大理寺少卿薛嵩為寺卿左寺丞  
袁復為少卿



殺陝西按察僉事寧海林嘉猷嘉猷師方孝孺洪武末以儒  
士校文四川蜀獻王薦為成都府 建文初累遷陝西僉事  
至是坐方黨逮死

丁亥詔諭安南暹羅爪哇琉球日本蘓門答刺占城諸國

戊子都指揮使劉江為中軍都督僉事朱榮為左軍都督僉  
事馬榮紀清為右軍都督僉事都指揮同知朱崇為後軍都  
督同知何濬薛脫歡許成並為左軍都督僉事高成為右軍  
都督僉事譚深為前軍都督僉事都指揮僉事陳懋為中軍  
都督曹得山青並為中軍都督僉事張欽為中軍都督僉事

高士文劉保華聚為前軍都督僉事譚青王端為後軍都督

僉事命各衛所屯田如舊制專一人提調歲終上其入數

廬陵逃民俱復業勅勞都督韓觀

谷王穗請作宮殿於長沙以勞民已之

有言東南諸夷島多我逃人佐寇 上復勅諭之

下犯開原官軍拒卻之

己丑慶王榘來朝

命遼王植國於荊州



太平府試推官袁綱蘓州試推官徐道正前鎮平軍民指揮  
司試經歷馮本清前開封軍民指揮司試經歷陳常俱為監

察御史

庚寅高陽王高輿來朝秦王還國

周世子有燉自雲南來朝

召廣澤王允燧懷恩王允燧

辛卯賜在京官吏軍民鈔幣

殺刑部左侍郎胡子昭初名志高字仲常先廬陵人徙大足

縣父復初教授榮縣之東川因家焉生子昭志高弱冠舉經明行

脩授本邑訓導蜀王薦於朝太祖親試稱旨授翰林簡討

更名子昭尋陞刑部右侍郎建文初轉兵部左侍郎迨閭變

大內火子昭哀經哭入廟比有詔詰問子昭歷陳君臣大義

至覆辨論詞色過激下詔獄居五月覆詔詰之不屈數請死

遂磔於西市年四十一亡子婦黃氏死焉女金奴没入宮姻

屬逮戍五十八家加帶縣賦八百石其弟山東按察僉事志

遠預奉母避難約曰忠孝務各努力志遠遂負母而逃不知

所之金奴入宮五十餘年天順聞乞歸老東川子昭嘗從

方孝孺講學漢中蜀王遺之詩有曰不憚三巴路欲成仁者



心殆詩讖也

陳鑿曰聞之事君者不得顧家此忠臣烈士當利害之際不能兩全不得已而為是言耳身雖死必有不安於心者求為忠臣而視其親就鼎鑊豈人情也哉公有母在能先為之所而從容以死尤人所難陸宣公所謂上不負其國下不負所學而公又能不傷其親者矣

工部右侍郎張顯宗江西布政使楊理按察使房安僉事呂弁等俱成興州以軍士執告其罪也  
夜月犯壘壁陣星

壬辰許回回可吉思市馬寧夏償以布  
工部尚書嚴震直震直為程人洪武五年薦授試參議尋授戶部郎中進工部右侍郎逾年進尚書癸酉坐事降御史使龍州乙亥脩桂林靈渠尋進右都御史復為工部尚書丁丑請廣鹽得行江西安贛吉臨諸郡高皇敬稱之建文初督餉山東至是使安南回雲南悲憤吞金而死  
談遷曰嚴震直後死諸家謂南使回滇值文太師悲憤  
賈志第龍潛纔三月安能遽及於滇且露其跡也故從亡  
隨筆時太師政在襄陽廖平家則震直死別有緣耳國史



云寡學無識善附權要上頗薄之史未足盡信大抵以  
樸質勤敏稱視張統王純死又有間矣

曉刻火星犯左執法

甲午有罪人携家佃北平流罪三年死罪五年後釋為氓

定功臣死罪減祿例武官軍士贖罪例

乙未申木鐸教民之令

詔諭兀良哈大小頭目

右軍都督同知韓觀為征南將軍總兵官鎮守廣西

故燕山右護衛百戶王真追封金鄉侯謚忠壯

命戶部遣覈太原平陽澤潞遼沁汾餘丁實北平各郡縣仍

戶給鈔俾置牛種農具五年後稅之

賞從征扈駕將士

夜月犯天囷星曉刻火星出左掖門外

丙申肅王稜還國

杭州知府虞謙為大理寺左少卿

夜金星入房宿

丁酉蜀王還國

夜大星青白光自雲中流近濁



戊戌工部左侍郎黃福為尚書是日工部左侍郎張思恭奉  
建文帝命出使還職

夜大星二俱青白光一自闕 流雲中一自軫宿流游氣

己亥夜大星青白光燭地自文昌流近濁

庚子慶王還國

左軍都督僉事劉貞為左都督鎮連東真恒有媿色以女為

辛丑復議大賚臣民

作鳳陽浮橋

乙巳建金錄大醮於朝天宮薦福於

先帝后

命武原伯徐理等往北平度地處罪徙之民

命都督陳用孫岳陳智移山西行都司官軍於北平設衛岳

前守中都不下

丙午大同中護衛改定州衛

夜大星青白光燭地自雲中流近濁二小星隨之

戊申復齊王棹國青州

秦愍王次子尚烈來朝

己酉作皇后金寶盤龍紐

鎮守揚州都指揮同知王禮為河南都司



庚戌夜大星青白光燭地自五諸侯流游氣又大星自外屏  
流羽林軍

十朔亥朔夜金星犯天江又大星二俱青白色一自八穀流上  
台一自天厨流雲中

壬子寧王權來朝

癸丑楚世子孟烷來朝

前湖廣布政司左叅議楊砥為鴻臚寺卿

夜二大星一赤光自天園流近濁一青白光燭地自外屏流

霹靂

甲寅諭兵部尚書茹瑞劉儒以逃軍降罰本將之罪

曉刻火星犯進賢星

乙卯許羽林前衛指揮僉事王三哈歸彰德養母

丙辰享太廟畢遣祭功臣廟著為令

監生王孚陳禮朱聲何海陸禎王政劉端姚綱阮容姚伯善

俱為給事中大理寺左評事周新蔡瑛孫碩劉觀右評事楊

廉司賓署丞周敏序班劉英兵部司務張進遠志戚文明行

人李公敏充誠施晏顧謙牛庸傅霖戚敬為監察御史

夜木星犯天江



丁巳前班平屬官朱寧等二百十九人俱遁去命輸粟贖罪

訖成興州

宴功臣

戊午頒洪武中冠昏喪祭服舍器用圖示中外俾人民遵守

選陝西河南山西山東鳳陽等處力士三千五百人

己未脩高皇帝實錄勅太子太師曹國公李景隆太子少

保兼兵部尚書忠誠伯茹瑄監脩總裁官翰林院學士解縉

總裁務合至公以光簡冊是日又勅纂脩官翰林學士王景

右通政李至剛翰林侍讀胡靖黃淮曾日章胡儼侍講鄒緝

楊士奇金幼孜脩撰李貫吳溥編脩楊溥鄭好義檢討王洪

五經博士張伯穎王汝玉典籍沈度潘畿待詔王廷齡科

給事中朱紘吏部郎中徐旭禮部郎中朱遠戶部主事端木

孝思太常寺博士錢仲益國子監博士金玉鉉助教王達行

人蔣驥按察使僉事葉砥知府劉辰知州鄒

濟知縣王褒知縣楊觀知縣梁潛知縣

趙季通知縣沈喻教諭劉宗平教諭解榮

訓導羅思程訓導傅貴清晉府伴讀蘓伯厚靖江府教

授張顯諸生端禮楊孟力朱逢吉莫士安馬定唐廣私命建



文事附其後焉

談遷曰國可滅史不可滅靖難之事彼棄履而此止戈名  
正言順夫何疑之有今韋建文而仍洪武孫蒙祖號是似  
以父子角非所以妥高帝在天之靈也漢以不呂雉而  
廢本紀唐不以武曌而廢實錄成祖英主如董狐據理  
以爭且慷慨悟矣惜在廷之默也

真人張宇初來朝

脩灞橋

辛酉江西布政司改寧王邸

誅中軍都督同知陳質以建文中奏代王強奪民女也

癸亥夜金星入南斗杓

開原備禦都指揮吳立閻警遣指揮莊濟拒十襲之值

衆我指揮張恂李冕棄軍走大進濟力戰卻之命斬張恂

李冕以狗

曉刻火星入角宿

乙丑夜月犯昴宿火星青白光自離宮流河鼓

丙寅陝西布政司右叅政戚存心為禮部右侍郎陝西按察

使師達為兵部右侍郎副使王平為左僉都御史僉事朱逢



吉為大理寺左寺丞

鎮遠侯顧成鎮守貴州

肅府護衛改莊浪衛

丁卯定北平守城功賞

復餘姚千戶所

殺兵部尚書鉄鉉鉉鄧州人入太學授都督府斷事賜字鼎

石進禮科給事中屢使稱旨尋擢山東布政司左叅政建文

己卯燕人圍濟南三月拒卻之詔賜金幣入謝拜山東左布

政使尋進兵部尚書監盛庸軍壬午四月又敗燕人於小河

斬驍將王真中原震動及燕人渡江猶擁兵淮南圖興復至

是擒至背立闕下抗詞不屈刺其膝截耳鼻堅不一顧乃寸

割之罵喃不絕年三十七父仲名母薛氏皆年八十餘海

南子福安年十二戍河池福昌七歲克局匠皆僂死妻楊氏

下教坊司病死二女終不受辱久之赦出適士人

鄭曉曰鉄公壯猷偉略兒濟南以障江淮而豐沛不守徐

揚震盪無可為矣使公用於鄭村壩白溝河未戰之前事

未可知也

許相卿曰鉉以非常之才匡難殉國遭天命已改志不克



就然剛毅果敢之氣耿、激烈不可屈撓自其早歲受知  
高廟已負託孤寄命不屈之節乃卒以烈誠奇畫震耀今  
古文皇每對群臣特稱其忠焉

王世貞曰壬午之難有功而無媿色者一人焉曰鈇司馬  
銘已巳之難有功而無難色者一人焉曰于司馬謙其人  
才同也忠同也酷禍同也

群忠事略曰嗚呼使中原數載之間守土之臣盡如鈇也  
則靖難之師雖出神笑豈能飛渡江淮也耶惜乎用之已  
晚不能盡厥施耳

錢士升曰鈇以死守濟南牽北兵及其赴援東昌再一戰

小河南斬將奪旗遊師震動鈇之功亦偉矣然而南帆兢渡

北幟益張淮水瀰、豈能支柱鈇雖擁殘旅要之規圖興

復非其會矣當其鈇板詐降神牌拒擊其智謀詎出張許

之下而時運所值勢無復之假如黎軍之計即行而神京不

存身雖徑趨北平亦烏能違天自立乎

辛未貴州蝗命賑以鈇免徭役

壬申谷王穗之國

寧夏總兵官何福奏徵騎卒五月一更也田胡卒簡驍說免



其租購河州馬給守隘將士皮裘狐帽上悉從之

癸酉定海縣丞溫仲和左溪縣丞孟籌俱復河南僉事

甲戌詔還軍士所掠民間子女

夜大星青白光自婁宿流游氣月行太微垣端門曉刻月犯

左執法

乙亥復盧淵兵部左侍郎

旌丹徒人唐川孝行

左軍都督僉事徐凱卒合肥人

丙子甘州中衛左所軍張真上書言事

上曰成卒能言賜

衣一襲鈔千貫

戊寅慶成王濟炫來朝

改周邸於洛陽

復遼東及在京罪人忒於遼者仍原衛屯田

己卯中軍都督僉事宋晟為後軍左都督

欽天監占有邊警命嚴備

夜大星赤光自翼宿經端門流謁者旁

十一月庚辰朔夜大星青白光自軒轅流下台

辛巳監生馬賓為禮科給事中



壬午命禮部清理釋道二教

夜大星青白光自天廟流游氣曉刻大星入亢宿

甲申高平王濟燁來朝

令武安侯鄭亨於千戶寨灰嶺慶州神樹西馬山七渡河設  
片堠新昌伯唐雲率兵自小興州至大興州牛嶺會塔山龍

州諸處屯種

都指揮使景福為右軍都督僉事薛貞為後軍都督僉事

犯盤山官軍邀擊敗之

丙戌奉天新殿成

丁亥復安東中屯衛大同瀋陽二屯衛俱隸北平都司銅鼓

五開靖州三衛仍隸湖廣都司

戊子翰林侍讀解縉為侍讀學士侍講胡靖編修黃淮檢討

胡儼皆進侍讀脩撰楊榮編脩楊士奇檢討金幼孜皆進侍

講

庚寅開高縣鳳凰山銀坑

夜月犯天囷星

辛卯長山王賢煥來朝

壬辰立皇后徐氏詔天下



召廣澤王允熲懷恩王允熒至京廢為庶人  
甲午皇三女封安成公主

乙未復荆府中護衛隸遠府改宣府護衛為長沙護衛仍隸  
谷府

丁酉左軍都督僉事何濬坐不宿衛免官詞寧夏

己酉晚刻火星入氐宿

庚子都指揮使梁銘為後軍都督僉事

辛丑朔涼州命羅守將都指揮丁斌怯敵之罪

辛丑河南布政司 參議杜驥按察僉事吳彝都指揮僉事

劉珪以大水移家避入周邸俱謫成興州

夜大星赤光自文昌流紫微西籬外

壬寅詔諭兀良哈斡野人諸部曰今天下一家邊將言爾

諸酋長誠心歸向朕用嘉之特令百戶裴牙火里勅諭爾其

各居邊境永晏生業商賈貿易一從所便欲來朝者與偕至

北平左布政使郭資為戶部尚書仍署司事

夜月犯太微東垣上相星

癸卯岷王根來朝

夜大星青白光自太子星旁流游氣



重慶府教授馮莊甫秩滿止貢士三人降學正著為令

左副都御史陳瑛劾禮部侍中黃觀太常寺少卿廖昇翰林  
脩撰王叔英衡府紀善周是脩浙江按察使王良沛縣知縣  
顏伯璋等其存心不異畔逆宜追謬上不問

乙巳朝鮮國王李芳遠入貢

丙午夜金星犯壘壁陣曉刻月犯罰星

己酉夜大星青白光自太子旁流天梧曉刻大星赤光燭地  
自紫微西藩流輦道二小星隨之

十庶戎朔寧化王濟煥承和王濟煥來朝

駙馬都尉宋琥尚安成公主

右通政李臣剛為禮部尚書

量免壯年山東河南鳳陽淮安揚徐歲辦有差

辛亥上曰公侯歷事皇考者今皆年邁朕不忍勞非見

任事者其令以朔望朝祭

壬子勅諭功臣曰古人君以武功定天下者必賴將臣之力

厥後往不能保全何哉處高位者易驕縱犯刑法者多怙

終人君代天理物豈容私其間哉所以罰加焉必也高皇

帝立法垂憲欲世一行守功臣有犯罰戒再三戒之不改乃



按誅之至親至舊不敢曲原志人君子莫不謂高皇帝英  
明果斷上畏天命下畏民情也爾諸功臣昔受高皇帝厚  
恩今事朕朕欲爾等悠久共富貴若復驕縱怙終不問則違  
高皇帝成法問而寘諸法必謂朕寡恩今錄高皇帝戒勅  
申明布告尚永遵之爾之不遵後悔無及

嚴武臣冒襲之禁

癸丑蠲北平山西山東河南鳳陽淮安揚徐明年夏稅絲綿  
并山東鹽司虧課以荆州長沙商稅予遼王谷王

甲寅遣諭哈烈撒馬兒罕等國各賜金織文綺

詔諭別失八里王黑的兒火者并賜綵幣黑的兒火者元裔  
也

戶部議京官軍士支俸格公侯駙馬伯祿全支米文武官一  
二品支米十之四三品四品支十之五五六品支十之六七  
一品支十之八餘折鈔每石准鈔五貫九品雜秩吏胥旗軍  
並全支米從之每石增鈔五貫

乙卯復設各郡縣陰陽醫學

鴻臚寺序班汪觀清為右寺丞本胡人諳番書



丙辰設雲南益養木邦孟定三府威遠鎮沅二州以土官刀  
木旦罕的法力渾立為知府刀第黨刀平為知州  
丁巳許欽天監官秩滿不考績著為令

庚申保定知府維翰加刑部尚書

辛酉設廣西安隆長官司隸泗城州

寧夏總兵官何福請討邊一叛去者勅曰若兵討叛其未叛  
者亦將置疑不若姑聽其去第嚴兵固圍養威觀釁可也  
壬戌定塚集軍吏代法萊陽縣人王丑保言洪武中戶三丁  
以上塚正軍一正軍死貼戶補役從之

癸亥復慶衛軍民指揮使司改廣寧中左右三衛仍為中左

右前後五屯衛設寧夏左右中前四衛

甲子韃官胡將怯烈帖木兒哈刺脫歡季刺兒來歸仍授千

戶怯烈帖木兒言阿卜兒却罕等五百餘人居塔灘咸欲內

屬勅何福招之

乙丑銅陵典史張璉為左通政舊北平按察副使

江西儒士軒伯昂為山東布政司左叅議時詔求懷才抱德

之士

金吾前衛指揮僉事徐膺緒為中軍都督僉事徐達季子



丙寅滄州鹽山等縣饑詔民採鹽易粟者勿禁  
夜月犯軒轅御女星

丁卯成安侯郭亮鎮守永平山海

上問兵部尚書劉儵天下馬數曰比兵耗止二萬三千七百  
餘匹上命循洪武故事嚴督所司孽牧

戊辰都指揮同知趙忠為後軍都督僉事

己巳義烏教諭高澤疏請攬政納言上嘉納之

庚午諭禮部京官及外覲官吏使俱預元旦宴監生諸生吏

僧道軍民人等俱賜鈔

壬申許昌平保定永平民兵還籍

癸酉諭戶部來春遣人勸耕江北因歎曰古者民無菜色然  
後天子安享誠四海皆足雖不感饌未嘗不樂

甲戌壽昌王孟焯來朝

丁丑賑順德保定貧民鈔三十萬錠

嘉定周程請治東吳水利從之

夜大星青白光自軍門流庫樓

戊寅享太廟

夜大星青白光燭地自太陽旁流北斗杓



癸未永樂元年

正己卯朔御奉天殿受朝賀

庚辰勅中外文武臣曰朕惟天德好生人君承天受人而已  
夫興圖之廣非一人獨治自古帝王與賢共之我太祖皇  
帝受天明命勤愛保養生息三十餘年政教敷明近古鮮儂

亦惟任天下之賢理天下之務旁求民隱宣通德意用厥臻  
茲朕靖難承統重惟天下 皇考天下軍民 皇考赤子即  
位以來夙夜匪寧爾諸文武臣體朕茲懷母慈母怒母虐母  
貪母為格克母縱詭隨持爾庶年秉爾正直勵爾公勤擴爾  
忠恕共守成憲母或有違惟民出賦稅以贍軍惟軍執干戈  
以衛民軍非民不食民非軍不安惟爾文武群臣互為保愛  
無有侵害惟 皇考成憲實萬世治安之具遵之則吉違之  
則凶其悉心一志敬之慎之

朝鮮及朶甘烏思藏必力王瓦等國入貢



宴諸王於華蓋殿

北平流民復業者十三萬六百餘戶

辛巳罷松陽縣銀坑以礦竭也

甲申復前應天府尹向瑒官

乙酉享太廟

丙戌群臣請立太子不允

丁亥左副都御史陳瑛為左都御史桂林府同知史仲成為

右僉都御史

戊子命汝南王有勳居雲南之大理以弗容於父也

止營州三護衛官赴京

辛卯上南郊

禮部尚書李至剛等請遵

司為京師從之詔改北京

高皇帝中都之制立北平布政

謝彬曰商遷五都不別置員周營洛邑惟命保釐漢唐舊

邦止設京尹宋於西京亦命留守今保釐京兆之任即府

尹是已未聞兩都並建六卿如今之日也說者以為京師

者大衆之義也物無兩大之理故往一輒有異議至謂商

京吏部不典銓選禮部不知貢舉戶部無歛散之實兵部



無調遣之行視古若為冗員嗚呼是豈知祖宗設立之初意有未易以常情窺測者夫宮闕陵寢所在六軍城守之事庫府圖籍之所儲東南財賦之所輻輳雖設六卿以分理之猶懼其不給也而况以為冗員而輕議之哉丘文莊有言天下財賦出於東南而金陵為其會戎馬盛於西北而金臺為其樞並建兩京所以宅中圖治足食足兵據形勢之要而為四方之極者矣嗚呼得之矣

談遷曰漢立兩都采設四京究其陪畿不異郡國今南北通郊各為輦轂及涿鹿之馬辰拱既久秣陵絕駕而百司

並置如故也班張復肉鼓吹休明不其盛與

癸巳遣祀歷代帝王

保定侯孟善鎮守遼東

增周王歲粟二萬石

復高以正監察御史

許僧道三年給牒

甲午定牧馬法牝馬一配牝馬三歲課一駒給軍士非徵發

不得擅遣

夜月食陰雨不見禮部請賀不許



乙未設者樂旬大侯平崖灣向潞江五長官司隸雲南都司  
寧夏左右護衛改寧夏衛中衛

夜月犯太微垣左執法

丁酉後軍左都督宋晟為平羌將軍總兵官鎮守甘肅

己亥燕府典膳副王真為光祿寺少卿

庚子宛平縣丞宋斌為真定知府前守城功龍虎衛經歷徐

文英為浙江道監察御史進士洪堪為廣東道監察御史

壬寅夜大星赤光流雲中

甲辰設普安撫司土酋慈長為安撫使初曰普寧改為置

流官吏目隸四川布政司

丁未夜木星犯建星

二戊申朔軍都督僉事山青卒徐州人本燕府左護衛百戶

己酉行人司副李常為光祿寺少卿汀州推官高政為寺丞

庚戌設北京留守後行軍都督府北京行部北京國子監改

北平府為順天府北平行太僕寺為北京行太僕寺行都督

府置左右都督都督同知僉事無定員行部置尚書二侍郎

四六曹吏戶禮兵刑工部中員外郎主事各一

寺度戶部尚書郭資刑部尚書維僉俱為北京行部尚書安



岳知縣康汝楫 按察僉事馬京為左侍郎臨江知府劉  
翼南京戶部郎中李景為右侍郎汝楫蓋舊邸臣也

王子臨桂縣丞譚勝受建陽知縣陳敏清縣知縣文郁監生  
孔復楊銳張文明李時秀蔣彥祿歐彥貴何器劉先為監察

御史

賑山西平陽饑

嚴誣告法

甲寅遣左通政趙居任賜朝鮮金印龜紐如國初以建文更  
之也

詔諭暹羅國王昭祿群膺哆囉諦并賜駝紐鍍金銀印

乙卯書戒代王桂曰別久懷思聞吾弟縱侈取財國人甚苦

告者衆矣果若其言吾弟大謬夫天下之人 皇考四十年

辛勤保養以遺子孫其罪合死猶當請命况乃實無吾弟審

思拘囚困辱不記建文時耶

命監察御史分巡各省民瘼

丙辰監生范紹馮添劉志聰吳禎徐儀彭建初孫恒教惟善

張信黃瑤王常俞驕周瑞丘陵李珣韓溫劉鳳蘇冲葛忠遜

通仲庸熊璞為監察御史



丁巳釋奠大學

戊午祭太社太稷

已未遣諭迤北可汗鬼力赤曰元運既終我皇考太祖皇帝受天命撫有天下朕以嫡子奉藩於燕入繼大統嘉與萬邦同臻毋樂比閭塞北推奉可汗特遣指揮朵兒只恍惚等齎織金文綺四端致朕意今天下大定薄海內外皆來朝貢可汗能遣使往來同為一家豈不休哉并勅諭太師右丞相馬兒哈咱太傅左丞相也孫台太保樞密知院阿魯台等賜文綺各二

攻破遼東懿路寨勅鎮守左都督劉貞謹守不可窮追又

勅寧夏總兵官何福加備

甲子武定侯郭英卒英鳳陽人從起滁泗渡江從戰禁江武

昌從大將軍開北平鎮北平以前軍都督僉事屬潁川侯征

雲南洪武十七年封祿二千五百石追封營國公謚武襄

談遷曰郭武定以渡江之舊至甲子始享茅土則征南功

也今稗說謂英射陳友諒縛張士誠其績似偉高帝豈

忍遺之耶嘉靖中裔孫翊國公勛購門客創飾之俸躋太

廟不足信也噫胡監之黨靖之累諸徹侯往不令終英



考全牖下亦善保富貴者矣

乙丑皇長女永安郡主改封永安公主儀賓袁容為駙馬

都尉

封尚烈永興王尚煜保安王

遣司禮<sup>監</sup>少監侯顯微為恩藏尚師哈立麻工素聞其道行

卓異也尚師本帝師史諱之

胡將伯帖木兒等自塔灘來歸授指揮使命居寧夏

丁卯南昌左衛改南昌護衛營州左護衛改隆慶左右衛中

護衛改寬河衛

除麓川宣慰司加課萬一千金

戊辰諭戶部兵部以衛所郡縣官私役軍民者罪之

左軍都督僉事徐真卒

盱眙人以前軍功歷左軍都督僉事戰靈壁敗降命督民屯田家雲嗜酒竟

死

己巳琉球國山中王察度入貢

大名河間廣平順德真定保定饑賑之

禮部請今年八月補京省鄉試從之

殺南昌知府臨海葉惠仲惠仲初授廣武衛知事建文初以

知縣充史官脩洪武實錄進守南昌至是坐實錄措斤



舊事且方孝孺黨也年六十四妻蕭給千戶泰貴為奴  
辛未命法司五日一引奏罪因如洪武例會訊承天門

寧夏右衛改慶陽衛

疏嘉定秦趙二淫

壬申瘞北江中原暴骸

甲戌高陽王高煦率兵往開平操備既行書諭之曰爾出太

寧未至開平四十里即下營先騎偵勿令覺乘以深入

夜襲之若戰則武安侯鄭亨居中安平侯李遠武城侯王聰

左右之爾將精騎一二千援之母利其牛馬窮追也

乙亥減曲靖中鹽米二石為一石五斗

丙子緩輝縣官牛之價

丁丑定捕盜賞格金五十幣四鈔二千貫

分遣監察御史中官覈各處銀冶

三朔寅朔群臣復請立太子不允初靖難兵起高陽王高煦武

勇使從師領勅騎接戰白溝東昌有功上戰浦子口而卻

高煦搏胡騎力戰敗威庸因渡江故甚愛之及即位曹器召

丘福王寧及侍郎金忠議儲俱請立高煦也高於世子立子以長

平世之道也金忠不可已問學士解縉對曰以臣所見異是



世子忠敬仁孝天下莫不聞守成令主也且奪長為亂道又  
曰好聖孫已召禮部主事尹昌隆於便殿對如之命昌隆勿  
復言復召問庶子黃淮又對如之詞曰早朝罷雨上獨留緝  
語良久戒勿復言遂賜象笏  
談遷曰高煦汗馬功江上之捷業允其當璧故不欲中變  
遷延未決其後迫於國是雖大本不搖而江保黃儼輩之  
讒構未已也噫仁廟之得備也其不為建成之續者亦  
幸矣  
已卯魯世子肇輝嗣魯王

前北平按察副使王禮為戶部右侍郎  
夜大星青白光燭地自即將旁流紫微西籓  
庶辰江陰侯吳高鎮守山西大同  
誅遼東都指揮同知沈永以十寇三萬衛不以聞及入朝復  
隱不奏誅之令兵部榜諭天下欺蔽者罪如永  
壬午北平行都指揮使改大寧都指揮司隸後府設保定左  
右中前後五衛俱隸大寧都司  
甲申昏刻大星青白光自南河流游氣  
乙酉江都郡主薨懿文長女儀賓耿璿



丙戌琉球國山北王攀安知入貢

丁亥諭兵部以守九門功再進一級於是都督僉事劉江為中軍都督同知許成為左軍都督同知譚青為後軍都督同知都指揮使童信為前軍都督同知徐善為中軍都督僉事曹隆馬瑛為左軍前軍都督僉事都指揮同知呂得昇方敬為中軍都督僉事周長為左軍都督僉事冀英王祺為後軍都督僉事王忠為前軍都督僉事

戊子平江伯陳瑄及前軍都督僉事宣信俱克總兵官各率舟師海運瑄往遼東信往北京

開封蝗賑以救麥

辛卯岳敏周樂喻良為監察御史初敏河南按察副使良僉事樂陝西左叅政皆罪免尋改官

琉球國山南王弟汪應祖入貢

壬辰命命婦遇節朝中宮餘免

癸巳夜大星青白光自天幅流尾宿

甲午北京山東河南鳳陽淮徐饑賑之

乙未以澤潞民稠土狹分佃裕州

丁酉都指揮同知周廣為左軍都督僉事



蘓州大雨水決隄傷稼命葺治

戊戌脩殿太師比于墓祠

瀋陽中屯衛軍唐順言衛河出輝縣西北八里太行山流徑

衛輝祇直沽入海南距河陸路纔五十餘里若開衛河距黃

河百步置倉受漕糧轉至衛河甚便 工從之

己亥夜大星赤光燭地自太子旁流軒轅

亭且鄧州官牛疫有司迫民償至鬻其子女 上聞而怒之

免民償罪有司擅責者

夜大星赤光燭地流雲中

壬寅京師大雨水

乙巳諭兵部再申停不急之務非奏行者罪之

四 丁未朔安南攝國事胡奩入貢表賀即位且奏前王陳日燿

率亡子臣陳氏甥權國事主祀四年乞封爵效育禮部言遠

夷荒忽難信宜遣使廉察從之

戊申勅曰朕賴天地宗社之靈 父皇母后之佑以有天下

凡更改 父皇之成憲濁亂天下之奸惡悉就誅僂其餘大

武官仍用無疑陞賞斥罰從至公而已昔唐太宗撥亂反正

貞觀盛治近古罕倫求其故則太宗善用人釋王珪魏徵之



熈怒舉靖尉遲敬德於仇敵用房玄齡杜如晦於異代宋太祖起甲冑平列國與世休息開三百餘年洪基亦惟其時信任前朝舊臣范質王溥石守信王審琦等夫是二君尚借異代况朕父皇之臣非仇怨他人之比近有尚懷疑慮妄生異議處事則不盡心此不明朕推赤之意也夫人君代天理物故曰天子奉行天命故曰天更若無天命有力者皆得為矣元有天下廣土衆民國富兵強孰得勝之天命一去群雄並起爰統一於我高皇我高皇又用其才釋怨錄仇所以創業垂統身致太平今朕豈敢違天命與父皇之德盡忠

於國雖仇必賞心懷異謀雖親必誅今敢有妄分彼此懷疑怨謗不安職事者事發族滅

己酉戶部尚書夏原吉往治浙西水利時嘉湖蘓松歲罹水災

庚戌周王楠請立太子未允

壬子平陽王濟熿來朝

遣鎮撫答哈帖木兒等勅諭瓦剌酋馬哈木太平把秃李羅

戶部右侍郎王禮卒

同始人監生擢北平按察副使生事降

癸丑罷中軍左都督劉謙



甲寅楚世子孟煇永安王孟炯來朝

乙卯周世子有燾順陽王有烜來朝

袁州府訓導康敬先為翰林院檢討

曉刻大星青白光自牛宿流游氣

丙辰通政司左叅議李文郁為戶部右侍郎監生余得之為

科給事中張政原汪俊民趙能為監察御史

戊午蜀世子悅熯來朝

浚華亭工海運鹽河

己未賑上海饑民粟四萬九千九十餘石

庚申長山王賢峻來朝

辛酉行人楊渤等使安南諭其國人推立胡查果否以聞

右副都御史黃信初禮部尚書李至剛妻父坐臺獄論死乞

免上問何以知之曰黃信告臣刑科都給事中周璟等劾

其泄事故

壬戌夜大星青白光自輦道流游氣

癸亥萬壽節宴文武諸臣

甲子楚世子孟煇欲買河南人口勅曰河南周王封也汝遣

人入境或有縱恣將為爾累可不慮乎



乙丑諭寧夏總兵官何福甘肅總兵官宋晟以月犯氐宿占  
主將有憂又金星出昴北主北軍勝卿等守邊嘗加警省  
談遷曰天道遠人道邇金星出昴北臚胸河之敗五將不  
返兆見此矣  
作鹵簿大駕

丙寅勅鎮守雲南西平侯沐晟拔總旗中功最者為百戶以  
屬軍士

禁金銀交易以通鈔法犯者准奸惡論  
丁卯以代王桂檀役民命自今非朝命毋擅發

河州洮州番族入貢定賞格

辛未降岷府官屬勅戒之以不能輔導也

癸酉以駙馬都尉胡觀僭乘晉王標驕見劾宥之

甲戌襄城伯李濬克總兵官錦衣衛指揮陳敬副之鎮守江

西

丙子中軍都督僉事孫岳以建文中在鳳陽毀寺材脩戰

艦免官安置海南

五丁丑朔賜岷王榘丹賢并勅戒之

諭戶部但郡縣荒田即除其租庶免民橫擾



戊寅賜秦王尚炳書前令諸郡王出居近州縣練習講讀念  
四方水旱蝗蝻道殣相望脩葺供億勞費軍民勑至且令在  
國成造居室其即日罷又戒晉王濟熈令有司二十里設一  
火燎橋梁道路悉皆治除今何時也勞民如此乎  
庚辰禮部以太祖忌日請僧道誦經朝天宮不許

辛巳命福建作海舟百三十七艘

必里千戶所為必里衛女直

倭寇福建金山千戶所副千戶李敬遜之斬五千八級獲十  
一人焚賊舟一獲舟二陞指揮僉事

築安陸州京山縣江隄

太醫院使戴原禮致仕

壬午設北京社稷壇祠祭署

癸未北京行部郎中張執中為應天府丞

宥雜犯死罪以下戍興州文武官停俸並輸作百日

太白晝見

欽天監奏火星犯壘壁陣占將軍為亂宮中兵起上書戒

高輿

甲申封駙馬都尉袁容廣平侯李讓富陽侯世襲



乙酉四川越嶲叵部州改叵部長官司仍流官吏目

前北平布政司 參議成璉卒璉揚州興化人監生授代州

學正進守蔚州降有守城功 工即位進參議贈吏部左侍

郎厚賜其家子傑詹行人司行人

丁亥右軍都督僉事李彬為都督同知封豐城侯中軍右都

督陳懋封寧陽伯贈金鄉侯王真子通封武義伯都指揮同

知王友封清遠伯都督僉事陳賢封滎昌伯都指揮同知張

興封安鄉伯陳志封遂安伯俱奉天翊衛宣力武臣世襲祿

子石

遣監察御史劉從政等往諭保靖宣慰司屬蠻人仇殺

已丑勅駙馬都尉廣平侯袁容掌北京留守行後府事

夜大星赤光自雲中流彗宿

庚寅遣使捕蝗山東

五朔已鈞州蝗免今年夏稅

甲午封一皇五女常寧公主

設順天府儒學裁大興宛平二縣學如應天例

乙未勅戒代王條其三十二罪俾改過

勅北京留守行後軍都督府招諭口外逃軍聚劫者



勅兀良哈官軍人等但來朝者俱授官仍故地互市  
時議洪武中犯黨逆照刺為建文中用者俱發原配所有未  
犯罪為齊黃薦用者俱為氓一上不聽但洪武中黨逆發原  
配非黨逆而照刺者罷為氓

丙申置北京義勇後衛神武中衛忠義中衛隆慶衛各經歷

司

太僕寺少卿祝萬獻市朝鮮馬千匹將至命盡給連卒

丁酉南安府通判李敬初為太僕寺丞

河南蝗免夏稅

戊戌禁四川硯門黎雅河州臨洮等處私茶

己亥論守城功前北平左叅政孫瑜為戶部左侍郎左叅議

朱濬為左通政按察使喬穩為兵部左侍郎僉事楊泰為順

天府尹

庚子軍都督同知陳恭為右都督掌北京留守行後軍都

督府事

辛丑都指揮使高實為軍都督僉事終替陳泰軍務

故都督僉事陳文子敬為前軍右都督食祿俟年長任職

壬寅賑歷城等縣饑



金星晝見

甲辰諭天下諸司事于王府俱啟王知之  
夜大星青白光自紫微西藩流內階曉刻五星皆見東方  
丙午南海番禺潮溢壞民居

六月未朔許軍士六十以上還鄉以壯者代

戊申沐昕為駙馬都尉尚常寧公主

刑科都給事中周璟為山西右布政使

庚戌致仕戶部尚書王純言三事曰囚人不分籍但按程安

置曰攢運冬衣布花及時給邊卒曰通州迤東驛每站撥官

馬十匹悉從之

辛亥上苦久雨遣戶部侍郎李文郁往佐夏原吉治水

壬子削代王三護衛止給校尉三十人勅戒之

談遷曰代岷見削靖難所繇名也而惇睦如文皇亦未

能曲貸桀鰲既久怨艾無聞今獨咎建文者何也

癸丑遣監察御史袁綱給事中朱亮等撫安浙直軍民

甲寅五色雲見

丙辰夜金星犯畢宿

丁巳上皇考太祖聖神文武欽明啟運峻德成功統天大



孝高皇帝 孝慈昭憲至仁文德承天順聖高皇后尊謚冊

賢 戊午詔天下仍頒安南暹羅諸國

設冰凍垂西二蠻夷長官司隸貴州都司

夜大星青白先流雲中一小星隨之

辛酉 太祖高皇帝實錄成宴諸臣

甲子河南郡縣蝗不以閭遣御史按之

丙寅以實錄勞吏部郎中徐旭為國子祭酒太常寺博士錢

仲益知縣楊觀梁潛王復為翰林脩撰國子助教王述給事

中朱紘為編脩行人蔣驥為檢討國子博士金玉鉉為五經

博士晉府伴讀蘓伯厚為待書教諭解榮劉宗平為待詔教

授張顯為國子學正訓導傅貴清羅師程為學錄 知府

劉辰禮部郎中胡逸為江 西左叅政左叅議廣東按察僉事

李燁為福建左叅議知縣趙季通為國子博士按察僉事葉

砥政吏部考功郎中知縣唐廣雲改監察御史楚府教授吳

勤改開封教授滕寫官主事陸顯端孝思為禮兵部員外郎

監生鍾子勤陳彛訓劉謙沈文為中書舍人朱逢吉葉蕃沈

紹先華嵩為岳衛浩鄭中余從善陳俊良陳寔為監察御史



諸生金寔為典籍汪琦等十人為知縣

丁卯增行部戶曹主事一人

泉州衛金門千戶所械至海島逃民

未歸者予曰有之因遣勅往諭

戎辰始遣中官祭冲雷

武安侯鄭亨充總兵官武城侯王聰

總兵備禦宣府

宗人府經歷黃中引疾特許致仕

庚午尚寶司丞李得成為陝西布政司左叅政

能數言民事

辛未朝鮮表謝且請見服許之

壬申浚昌邑河渠

金星同月晝見

夜大星青白光自騰蛇流雲中

甲戌復鎮番衛建文申改守禦千戶所

乙亥舊承奉司改駐京內官監

七朔子朔命翰林侍讀學士解縉等輯永樂大典

戊寅詹事府錄事馬俊寧德知縣吳可成威海衛試經歷余



延慶寧遠縣丞黃童玉山典史李榮監生汪必先  
郭林金英張翥陳英楊泰劉寔王文為監察御史

已卯定靖江府輔國將軍品級禮儀

甲申夜金星入井

丙戌諭兵部曰漢文帝時閭巷有馬千匹為群其聽民畜私

馬

賑淮徐粟心千四百八十餘石

己丑復戶部左侍郎嚴奇良右通政丘顯官

興寧試知縣汪澄為廣西道監察御史

致仕禮部尚書鄭沂來朝命署禮部

唐貞遺指揮韋來等詔諭迤北可汗鬼力赤曰有天下者必

得天命非人力也宋失天命元世祖得之嗣後荒縱民散政

乖又復失之我高皇帝削平禍亂統馭華夷豈人力也哉

朕承天休入承正統重念帝王以天下為家遣使者報書幣

可汗當知天命廢興之故講好脩睦乃闔竊有覬覦古云順

天昌逆天亡可汗寧不鑒此再書諭意并致儀物可汗審之

遺繒綺表裡各二仍賜所部馬兒哈等各一

辛卯夜月食而不見



癸巳北京行部左侍郎許思溫為吏部左侍郎右侍郎墨麟  
為兵部右侍郎行部郎中王鍾為戶部左侍郎前北平布政  
司右叅議盧祥為刑部右侍郎

甲午真定知府呂震為大理寺左少卿

新昌伯唐雲卒雲不詳其始事 燕王領侍衛年長諸將勇

智服衆屢從戰守以都指揮使封世指揮使

乙未免崑山水災田租六千二百餘石

丙申戶部尚書郁新言漕運自淮毋舡可三百石以上入淮

河沙河至陳州更舡可載二百石以上至跌坡更夫舟入黃

河至小柳樹陸運赴衛河入京 工從之

丁酉周世子有燉來朝

占城國王占巴的賴入貢

夜大星青白光自奎宿流壘壁陣

戊戌夜大星青白光自參旗流四瀆一小星隨之

己亥前北平按察僉事謝池為大理寺右寺丞

遼東金州等衛蝗命捕之

庚子<sup>夜</sup>二大星俱青白光一自天樞流文昌一自離宮流匏瓜

癸卯紹興知府李慶為刑部右侍郎



甲辰夜大星青白光自天津流游氣

乙巳夜大星二俱青白光一自羽林軍流近濁一自北落師門流近濁

八朔午朔處州知府劉仲燾為工部右侍郎

戊申遣右僉都御史俞士吉賜戶部尚書夏原吉水利集至

是原吉上言浙西諸郡蘓松最居下流為所鍾常嘉湖高田

多環以太湖綿亘五百里而寬納杭湖宣歙諸水散注澱山

等湖以入三泖頃浦港湮塞滙流漲溢傷農稼為甚法宜疏

吳淞江袤二百餘里廣百五十餘丈西接太湖東通海前代

蓋屢疏之然當潮汐衝旋疏旋塞從吳淞江長橋抵下界浦

約百二十餘里雖通流然多窄淺從下界浦抵上海南倉浦

可百三十餘里潮汐淤已成平陸欲開濬費大且艱沙於泥

浮泛動盪難施工匠臣竊按視嘉定劉家港即古婁江通大

海常熟白茆港徑入江皆廣川通流宜疏吳淞江兩岸晏亭

等港浦引太湖諸水濬劉家白茆二港使其勢分松江大黃

浦乃通吳淞要道下流塞難濬傍有范家浜至南倉浦達海

徑可濬令深濶上接大黃達泖湖之水庶幾復禹貢三江入

海之舊水道既通乃相地勢置石閘以時啟閉歲水涸時預



脩築圩疇防暴流如此水患可息  
工從之役民開濬原吉  
布衣徒步晝夜行經度跡濬築捍皆身先勞之故功成  
蘓州知府湯宗下獄坐視水患也

己酉能吏周讓為戶科給事中

安丘縣紅河決傷稼遣築

夜金星犯鬼宿

辛亥脩和州圩疇

翰林院侍讀胡廣編脩王達主試應天

癸丑行人呂讓止智使安南按察副使閻良輔行人甯善使

瓜哇西洋蘓門答刺科給事中王哲行人成務使暹羅行

人蔣賓興王樞使占城真臘行人邊信劉元使琉球翰林待

詔王延齡行人崔彬使朝鮮各賜其國王絨錦織金文綺紗

羅有差并勅安南胡查母恃強侵占城

丙辰禮部言鹵簿宜有九龍車又舊金鉦紅鼓四鯢燈紅油

紙燈各三雙上曰先朝定禮豈可輒增第補其舊

丁巳設浙江福建廣東市舶提舉司始命內臣齊喜提督廣東市舶

己未左通政趙居任行人張洪僧錄司右闡教道成使日本

庚申設雲南楚雄縣儒學



辛酉賜晉王濟煒書戒其弟濟炫擗給驛書

乙丑平江伯陳瑄海運四十九萬二千六百餘石赴北京東連

丙寅羽林前衛致仕千戶王欽訐歷城侯盛庸不法賜銀鈔

進指揮司知

己巳定罪因謫佃北京例犯杖給牛種五年後賦役如民田

犯徒永不給直三年後如民田

庚午內官楊宣等勅諭麓川車里八百老搨古剌詔闡特冷

冬烏孟定孟養木邦等土官

復甘州前後衛威衛鎮夷千戶所

曉刻老人星見

辛未潮州地震

癸酉前北平都司經歷吳中為大理寺丞灑水知縣徐敬為

監察御史荊州試推官濮銘為雲南右叅政

甲戌夜大星青白光燭地出敗瓜西行天市垣至帝座旁

九羽子翔諭中外群臣曰為君難為臣不易創業難守成不易

剛柔寬猛適其中禮樂刑政有其序唐虞三代至漢唐宋率

繇諸道是故舜清問下民報虐以威誅四凶舉五官明五刑

然後無為恭己神禹承之無間可議夏桀之亂民從其暴成



湯之興無弱攻昧取亂侮亡隆脩人紀用章愾淫既奠四方  
子孫承之推監於成憲殷紂之亂商俗靡一周公相武王誅  
紂伐奄遷殷頑民滅國五十繼相成王制禮作樂垂拱仰成  
刑措不用漢承秦亂高祖令蕭何定律令韓信申軍法張蒼  
定章程法令嚴明惠帝清靜至於文景除挾書已內刑務崇  
寬厚唐承隋末諂諛汰侈暴慢成風高祖定官制頒律令行  
租庸調法沙汰僧尼道士勲臣犯法無所假貸太宗貞觀之  
後懲斬趾禁鞭背刑定律令變重為輕力行仁義幾致刑措  
宋興承五季之亂太祖太宗頗用重法糾懲奸慝躬自折獄  
務底明慎立法制嚴用法情恕咸平以後刪其繁密益務寬  
仁子孫承之含弘光大恭儉純誠未嘗殺一不辜此歷世守  
成創業之事剛柔寬猛禮樂刑政厥中厥序莫不遞用朕  
太祖高皇帝天錫大聖之資以當非常之變奮自布衣撥亂  
反正比三代漢唐宋創業之時又大相遠蓋中華禮樂化為  
左衽沈浸百年陵夷已甚高皇帝服古人所未易服齊古  
人所未不能齊兢業勞心焦思晝夜圖惟經權常變不  
得已而用刑特權時之宜耳及立典常既有定律復為祖訓  
恩剝削官並禁不用朕克遵成憲仰思聖謨夙夜祇服惟欲



興禮樂舉賢才施仁政以忠厚為治爾尚各共乃職敬乃事  
勿為朋比勿事貪黷勿恣情縱欲以干匪彝至於用刑必欽  
必慎期於刑措用臻康理以上不負皇考創業之艱而朕  
於守成之道亦庶幾焉  
曉刻金星犯軒轅左星

丁丑夜土星躔於女宿留於十二諸國代星之上  
戊寅高唐人王政言事擢刑科給事中  
己卯大興縣進嘉禾薦太廟  
夜大星青白光自虛宿入羽林軍二小星隨之

庚辰嘉興知府劉觀為雲南按察使未行政戶部右侍郎

瓜哇國西王都馬板入貢

辛巳勅吏部曰任官圖治之基也求賢任官之本也 高皇

帝聖德光華萬邦黎獻共惟帝臣肆朕眇躬克正大統永惟

萬幾不敢暇逸思欲旁招俊乂光輔邦家必明目達聰以弘

視聽內外諸臣尚體朕心於群臣百姓之中各舉所知無間

遠邇並以名聞書曰舉能其官惟爾之能舉非其人惟爾不

任古訓具存爾其懋哉

壬午開四川夾江縣井鹽



脩西華縣決隈

夜大星青白光自天苑行至雲中

癸未雲陽伯陳旭往南畿閱軍

寶源局鑄農器給山東被兵之民

夜大星赤色自七公行入天槍五小星隨之

己酉夜大星青白光自羽林軍行至雲中

子亥設大同左右二衛

戊子開化縣丞王鐸為禮科給事中布衣劉士傳為兵科給

事中山西布政司照磨周幹為山東道監察御史

脩郊城縣決隈

庚寅遣中官馬彬等賜瓜哇西王都馬板勅印并詔諭西洋

蕪門荅刺諸番各賜文綺紗羅

大寧都指揮僉事王庸嘗掠斃居民宥死戍邊

辛卯鎮守貴州鎮遠侯顧成上言雲南兩廣蠻寇如蠶上掃

除東南狡倭沿海嚴防亦無足慮惟北遺孽點悍遷徙鳥

舉即之如搏影終為國患及今小康數使使賞賚慰藉偵伺

動靜高城浚湟屯田積粟厲兵秣馬不冝一日懈若留家漢

北輕兵入寇據險設覆彼騎不得施出不得展蹈瑕候間我



可得志如是數年，難抒矣國家大事，臣所欲言者早立東宮，贊萬幾，使天下臣民共享太平之福。上善之，賜金幣。壬辰，吏部尚書蹇義等言：「建文中授官被斥，不宜復。」上曰：「此皆皇考所遺，安得以建文故棄之？」第量才擢用。是年，夜月犯畢宿。

癸巳，陝西行都指揮僉事張豫坐易官鈔戍邊。

夜大星赤光自天倉入天園。

甲午，設雲南騰衝永昌二守禦千戶所。

鎮守雲南西平侯沐晟言：「車里宣慰司土官刀暹荅侵威遠。」

州執知州刀美黨，宜討。上諭兵部遣諭之，果不聽。兵未晚。

也。已入貢謝罪。

夜水金星並見東方。

乙未，都察院左都御史陳瑛等劾歷城侯臧庸，怨望懷異，命

削爵。

丁酉，命撰皇考樂章。

復越州平夷，廣南三衛。

己亥，遣內官李興等勅勞暹羅國王昭祿，群酋哆羅諦刺。

禮部以日本貢使至寧波，請籍其兵器刀槊等，毋民鬻。上



命官市之毋其心

庚子歲上御右順門諭侍臣曰朕宮中病夜坐閱圖籍何郡  
羅饑荒何郡迫邊鄙且與群臣計議行之河南數處蝗旱朕  
用不寧使者省視不絕於道如斯民小康朕之願也

賜各衛胡人姓名

雲南左中前三護衛改雲南中前後三衛時岷王梗有罪革

之木金

壬寅禮部尚書鄭沂戶部左侍郎嚴奇良通政司右通政丘  
顯俱致仕賜勅宴上顧禮部曰是皆前皇考舊臣自今舊

臣老致仕者禮之視沂母得有貶也

十月己朔定軍功襲職例

丙午承天門守衛千戶奏工匠遺牌無名氏列賢鈔提舉司  
官吏不法上以私忿毀之命後輩語俱而問

戊申築杭州江隄

工謂六科給事中曰四方蝗旱民之艱食宦寺服食朝廷乃

有畜養雞牲糜費食米者此輩論其一日當饑一家之食業

行禁戢爾等識之再爾不宥

談遷曰宦豎飼牲至瑣細也輒干嚴諭而齊喜任市舶李



興使絕域開蒙韶勃馮恃威命其糜費且不勝計上既  
總功之察而言官噤不敢發何也

成陽侯張武卒武瀏陽人慈山右護衛百戶從靖難封爵達  
有勇力精涉書史賜祭葬贈路國公謚忠毅

已酉刑部右侍郎盧祥為左侍郎

大理寺卿薛嵩等奏各布政司所工死獄請遣御史分決從  
之命左都御史陳瑛等授御史簡書慎刑之意臨決苟有可  
生即與辨釋

夜大星青白光燭地出雲中行至近濁

辛亥辟任守禮戶科給事中

壬子宣城訓導周彥奇為刑科給事中

夜大星青白光自附路旁行入游氣又大星自太微西垣入  
五帝座

癸丑上御奉天門顧侍臣曰有言朕法令大寬者夫治人  
如醫有是疾則服是藥不反傷矣朕守成之日正不敢傷民  
之時無疾服藥朕不為也

談遷曰革除之初鷹鷂成風或成或誅家凜戶牖舊臣宿  
士惘疑沮喪殆無穴自避而猶以法令大寬動英主之聽



豈非陳瑛紀綱輩欲斤斧斷天下進其瞽說乎

夜大星青白光自紫微西蕃行至北斗杓

甲寅夜大星赤光自河鼓行入近濁

乙卯勅鎮守永平山海成安侯郭亮選三千騎勦十八盤賊

勅建昌府同知馮士成等二十六人曰爾等事我 皇考舊

矣建文中罷斥為民亦有不當罪者朕思任舊人仍召爾至

方今官備爾且歸家念皆蒼顏皓首弗欲重勞特賜冠帶仍

爾舊職歸尚撫爾子孫率化爾鄉人子弟因賜道里費有差

日本國王源道義入貢

山西蝗遣捕之

丙辰勅寧夏總兵官左都督何福曰朕委爾鎮守度事合宜

即行之勿人言自疑時有讒福者

緬甸頭目那羅塔入貢訴木邦養孟阻道乞賜職印從之設

緬甸宣慰使司

夜大星流三尺餘青白燭地自參宿至天園

丁巳遣內官尹慶等詔諭滿刺加柯枝諸國

戊午通事鎖飛自逆而還初鎖飛同鎮撫合哈帖木兒使逆

西時鬼力赤阿魯台擊瓦剌馬哈木大敗之鎖飛等被留鎖



飛夜竊其馬脫歸

夜大星光青赤自南河入柳宿

己未工御奉天門命侍臣輯古嘉言善行有裨君道者以

授皇長子諭曰朕少寓鳳陽民間細事靡不究知受命北

平經絕塞冒霜雪與士卒同甘苦自未所歷則博攷載籍覽

鏡昔人之行言令長子居守北平雖更臬奏讀亦令躬閱以

知為臣之難他日可為君也

賞北京守城官刑部左侍郎李友直等金幣有差

辛酉戶部尚書郁新等言湖廣夏稅踰期布政司守令俱可

罪 上曰賦入有經制耕穫有先後道里有近遠其勿問另

限之

甲子慶成王濟炫來朝

勅晉府長史龍鐘等曰古人臣無私交王府與西番往來以

私車遞送王年少不知古長史儒者謂不知乎廷臣欲朕法

爾朕姑不問尚慎戒之

夜大星光青白自右旗入西市東垣至侯星旁

己丑兵科給事中言天下衛所官吏工籍或額數盈胸或姓

名舛異或不印或不臣或不年月日皆不敬當罪 上曰人



精神有限業籍繁勞或短計數或成迫促姑條詰之更令詳  
進

夜大星赤光自奎宿入壁後小星二隨之

丙寅治福建巡海指揮李彛羅追邱福州中衛百戶孫瑛等

瑛擊海寇死彛不之援且冒功

戊辰脩祖陵易黃瓦

庚子浚江都瓜洲河壩

辛未高郵州判官李憲為監察御史監生張逢為科給事

甲

夜金星入氏宿

壬申靖安侯王忠鎮北京屯田

癸酉高平縣吏告知縣歛民財市馬給遞送大理寺臣言方

禁歛財宜抵死 上曰禁令不許為私也馬給遞送公事矣

釋復職

夜大星光青白燭地自土司空旁行至近濁

甲戌西洋刺泥國回回哈只馬哈沒奇刺泥等入貢附載胡

椒當稅 上以慕義免之

夜火星犯壘壁陣東第五星



十一月朔朝鮮入貢頒大統曆并賜朝鮮諸蕃國著為令

丙子或訐寧王權誹謗魘鎮事 上謂必出細人再逮之不  
發遂賜權書兄弟同氣近事悉不問第用小人必害家國更  
不必蔽

丁丑錦衣衛奏死罪一 上審其情宥戍興州因諭刑部曰  
朕矜其悞人無不可與自新且國家得一人耕亦可食數人  
其為例

夜大星出華蓋行入紫微東蕃內

己卯四川行都司奏越嶲<sub>地</sub>律<sub>地</sub>蕃<sub>地</sub>時掠宜勦捕 上曰令嚴

備遣撫諭之

庚辰右軍都督僉事陳俊等運淮揚倉粟百五十七萬六千  
二百石有奇赴陽武轉輸北京

癸未命浙江都指揮僉事程鵬率兵防倭寧波

夜大星光青白燭地自幸臣旁行至游氣

丙戌夜金星犯鍵閉

丁亥定給驛例

己丑晉恭王第六子濟娘來朝

辛卯勅兀良哈部落曰朕設泰寧福餘朵顏三衛俾爾統眾



鎮邊舊嘗授官者以聞其頭目等當授官者朕即授之俾世  
居土樂業三衛歲二貢每貢三百人

壬辰初洪武中免應天等五府民二稅每歲隙籍其丁壯供  
役及是內河淤塞皆來浚上聞其寒賜鈔罷歸令京軍次  
第成之仍賜鈔充催直

甲午前鄂府典儀副張益為刑科給事中

市哈器馬四千七百四十匹先是許其入馬

夜順天地震

己未上御右順門諭六科都給事中朱原貞等曰天下疾

苦朕恐爾曹未之悉也選郡縣考滿官假六科辦事隨爾等

在朕左右有問即對有言即達乃至令無一人言者夫郡縣

之大無一事苦耶在朕左右而尚默况遠千里退其申諭

以朕意

丙申廣西總兵官都督同知韓觀等平柳州山賊斬千一百

八十餘級俘五十一人

四川都指揮使胡淵有罪免

丁酉夜月犯太微東垣上相星

己亥封濟煥永和王



勅山西右布政使周璟曰爾擢官未暮聲稱綽著慎終如始  
尚敬懋哉

燕府紀善陳勝謙為禮科給中事引禮舍人趙從吉教諭申  
維岳為監察御史復曾寶鄱陽知縣劉子敏監察御史

儀封知縣許譽秩滿至京縣民詣闕乞留從之賜鈔綺一百

辛丑監生陳聰為戶科給事中

女直野人頭目阿哈出等來朝設建州衛軍民指揮使司

閏甲辰朔兵部主事牟論上言臣往廣西撫諭桂林諸蠻皆已  
歸化第獠獠恃險出沒不時兵至則匿兵退則出官軍遠入

觸瘴多疾惟土兵諳其地情可責收效今後宜令官軍協擊  
彼慕利爭先可免轉運損伍之患 上從之

乙巳靖江王府贊儀之國桂林

丁未巡按河南監察御史孔復招流民三十萬二千二百三

十戶墾田十四萬七千二百五十八頃

癸丑免鳳陽淮安徐州今年田租之半

甲寅工林知縣夏禮為廣東道監察御史

乙卯兵科都給事中鄭遂奏對失措謫沅州同知

戊午行人楊渤還自安南以國人表與胡查表合 上從之



庶申 工御奉天門諭左都御史陳瑛等曰國家設按察司  
糾察牧守無所不得問無所不得言也河南蝗旱數歲水為  
民災有司不撫字甚者股削之按察司官不一言其移檄切  
責俾來察所部軍民利病及布政司守令賢否以聞并檄各  
按察司及按治御史之在外者

辛酉賞福建金門千戶所千戶王斌巡檢解迪追捕海寇功  
進斌承寧衛指揮同知迪所鎮撫

癸亥 皇長孫至自北京

甲子 工謂侍臣曰朕每當法司奏囚未嘗不反覆思寃之

也毫有可生便從寬減蓋往在軍中未嘗輕僇一人況今為

天下主哉

浚山西平遙縣廣濟渠

丙寅賞從征哨騎功

南陽縣言逃民難賦役乞下令捕之 工顧戶部尚書郁新  
等曰民難樂去其鄉哉河南連歲水旱蝗螟守令鮮撫字之  
夫其田廬生業已廢棄捕歸益之困耳

太醫院使戴原禮致仕

丁卯禮部郎中夏止善等往封胡奎安南國王



寧夏總兵官左都督何福奏龍光魯灰等住不老山議入  
寇鬼惟的哥以資糧不給不從上知其請着不出槍桿野  
狐二嶺雲州之地必向山西大同勅北京山西為備勅未下  
山西奏犯灰溝村黃甫川如工所料  
夜大星如斗光蒼白燭地出中天雲中行隆有聲流三大  
餘至雲中

辛未上御奉天門顧侍臣曰北京山西寧夏一時地震朕  
心惕然爾言其故對曰兵戈土木應也上曰比年兵旅饑  
謹民困甚矣朕夙夜圖之朕避暑樓居武門端門而已後宮

墊隘不敢增脩慮土木也若云兵戈政當飭邊脩備

癸酉山東男子獻陣圖斥之

都督張文傑縱其子銘犯法劾免

十甲戌朔翰林院侍讀學士解縉等脩古今列女傳成上序

之賜縉及侍讀黃淮胡廣胡儼侍講楊榮全幼孜楊士奇檢  
討王洪蔣驥典籍沈度文綺衣各一襲鈔有差

丁丑免邊衛屯官赴京考覈

福建倭寇至京法當死上宥之戍邊

己卯復營州右屯衛



庚辰長清知縣王文貴湘潭縣丞馬榮宗廷安府照磨方仕  
陰鳳縣典史馮惠武昌縣丞沈斯賀縣主簿李守忠慶陽教  
授耿通監生郭瑄畢進華禎王生沈昊張麟熊觀薛魯前茲  
府長史司吏楊勉俱為給事中日照知縣李綜為監察御史  
辛巳置兀者衛女再野人

癸未封贈請難公侯伯三代及妻如舊制

初國朝諸司職掌云嫡母在所生之母不得封嫡母亡得並  
封又武官嫡繼母在所生庶母不封嫡繼母亡所生母在宜  
如其子職封繼母見在嫡母已亡合封繼母追贈嫡母嫡母

及所生母俱亡止贈嫡母時廣平侯袁容嫡母孫生母劉俱  
亡獨繼母羅在而封贈例不一命禮部翰林院議之曰若生  
母繼母俱在禮難並封今繼母在當封所生母并嫡母俱亡  
亦可追贈從之仍不為例

甲申勅讓鎮守遼東保足侯孟善曰爾此遣百戶傅漢出塞  
竊焉以致喪沒內失可用之人失外信於夷狄遼東地腴一  
年耕足數年之食海運可省爾不盡心屯務軍士皮裘必先  
給爾及今方言有曰展轉文移豈決旬可得以皮裘至天氣  
向暖苦寒之地下人何堪為帥如此國亦何賴



乙酉前燕府典儀正陸永成為鴻臚寺右寺丞行人司正黃  
宗載為湖廣按察司僉事杭州教授蔣良輔為戶科給事中  
賑棗強縣旱饑

丁亥諭吏部都察院曰為國牧民莫切乎令其令巡按御史  
及按察司凡守令到任半載以上以賢否貪廉之實奏

戊子夜月食

己丑夜木星犯羅堰下星

壬辰上御謹身殿閱太祖制集顧學士解縉等曰建文  
燔宮上皇考遺翰盡矣朕深悼痛有散落臣民家者乎遺書

各王府遣監生分詣天下購齊之

免陳州今年災租

癸巳夜大星青白光自紫垣微行至游氣一小星隨之

乙未楚世子孟烷來朝

貢士王偁為翰林院簡討上更問吏部簡討下何官曰博  
士典籍侍書待詔曰皆已除未對曰已除曰賢如何偁對曰  
舊博士中皆老成文學士偁初除未知上嘆曰國家用人  
以賢以勞偁賢未知勞亦未有乃令賢有勞者位其下其自  
博士以下陞職皆與偁同於是博士張伯穎王汝玉典籍沈



度潘畿侍書蘓伯厚待詔王延齡劉宗平解榮俱進簡討  
丁酉進賢縣稅課局大使唐簡為工科給事中太平府訓導  
王子沂嘉定知縣樊鎮為監察御史  
戊戌命戶部尚書郁新錄奏民間利病  
庶子陝西甘州山丹二衛獻瑞麥蕭州衛獻嘉禾  
辛丑安南胡查入貢且上章謝答時封命未至

甲申永樂二年

正朔卯朔夜大星青白光自雲中行至近濁

甲辰勅曰今春時和東作方興天下文武諸司各宜申明教  
術勸課農桑慎固封守問疾苦恤饑寒黽勉誠心崇寬厚之  
政

乙巳復命戶部尚書夏原吉治水蘓松時入朝言水雖道海  
舊河港未盡治遂復往大理寺少卿袁復副之  
右軍都督僉事陳俊從祀太廟失儀下錦衣獄



丁未復遣監生劉源等三十二人分訪郡縣購 太祖宸翰

戊申脩高郵湖隄

庚戌道士獻道經斥之

辛亥詔近年兵器遺民間者悉送官

宣府備禦武城侯王聰同安侯大真以千騎巡迤北

戶部右侍郎李文郁失廟祀下獄戍三萬衛

乙卯上南郊

丙辰陝西按察副使王煜妻屬吏女被劾徵下獄

夜月犯軒轅左星

丁巳勅占城國王占巳的賴以安南胡查服罪不復侵越爾

宜輯睦自保

定屯田賞罰例

戊午詔自今有犯交易銀兩之禁舉家屯戍興州

庚申論守城功前燕府紀善李達表主吳收相佐王克敬王

安王并李能何順甄實前監察御史柯榮俱為給事中

軍國府訓導陳仲完為翰林院編脩

辛酉禁民下海時開入私市外國致寇

夜大星出梗河青白色流三尺許倍大入天紀



癸亥山雲襲金吾左衛指揮使中軍都督僉事山青子

戊辰翰林院侍讀學士解縉侍讀黃淮主禮闈

己巳駙馬都尉永春侯王寧隆平侯張信晉壘書召世子

及郡王高煦赴京

戶部尚書郁新言河南都指揮劉英上屯數不足供半歲宜

罪上以始令宥之召英等諭曰屯田重務爾輩糜祿欲役

疲民以贍情卒大非策矣後不爾貸也

唐許鴻臚寺卿楊砥為禮部右侍郎徐州判官晏璧為山東

按察僉事

戶部左侍郎孫瑜坐事降北京行太僕寺少卿

辛未徵署山西都司事都督僉事曹遠都指揮使房昭下獄

以擅罪軍職也

夜大星赤光自天市西垣南入天江

二朔甲朔蜀世子悅燠來朝

勅江西總兵官葉城伯李濬等選卒三千勅永新縣賊毋濫

及

癸酉置奴兒干衛女直野人

禮部引奏北方歲貢生入學十年下考者當充吏上曰人



心志舒泰衣食温飽始進於學北方頃年苦兵餉故業荒其  
還學補十年後試之

乙亥江西按察使周觀政有罪謫河間驛卒

丙子復紀諄監察御史建文中謫睢寧知縣

命豐城侯李彬以卒騎二千助勦永新賊

丁丑毋連河等處朝使辭歸上召使者前勞之問田獵生

事久而退顧侍臣曰彼萬里來朝不稍棄顧問必不附敬侍

臣曰陛下懷柔至矣第問其田獵未及人民畜產何也

上曰田獵是其性俗若問人民畜產彼或心疑朕方懷遠故

不及也

戊寅禁小科交易大理寺得犯者請論違制律上問工部

明禁否對曰文移諸司矣曰榜市否對曰未上曰未榜市

其宥之

夜大星青白光出柳宿行入星宿

庚辰增靖州衛中右中中中前中後前前五千戶所

辛巳開捷為縣并鹽

壬午涇縣丞孫述器縣丞程竑孟縣丞李維亨偃縣丞孫英

孟津縣丞李遠新安縣丞裴榮臨漳縣丞韓隸宜陽縣丞梁



資青城縣丞周志繁時主簿賈賓靜樂主簿王順俱為給事中象山縣丞張翥為監察御史

設北京兵馬指揮司

乙酉禮部請定闈額上問其舊尚書李至剛曰各科多或

四百七十餘人少則三十人上曰朕初年且多之不為例

得楊相第一相洪武二十七年乙榜例教職時年十六父思

貽言未堪人師俾歸教之後仍入太學

丙戌設兀者左衛時兀者衛頭目脫哈等來朝上問兀者

丁亥雲南布政司左叅政張定有罪謫德州驛卒

戊子夜大星光赤黃出天津行至近濁

己丑永新賊平止李彬兵勿進

刑科奏強盜論死有年十五以下者二人上曰毫悼不刑

二兇去悼不遠其勿論

庚寅內官楊真童等往賜孟定木邦土官綵幣

壬辰琉球國中山王世子武寧以中山王察度喪告命遣祭

封武寧琉球國中山王

甲午前軍都督府言龍驤衛千戶妻無子妾之子代職居嘗

見惡於妻妻以刃傷子足妾訟其欲殺子請並治之上曰



妻傷子足恐無殺意使其母子嫡妾兩造殺吏之前非風化也付夫自治

乙未徐溝知縣王進為四川道監察御史

脩國子監經籍板

夜大星赤光自紫微垣闔闔門外行入北斗杓

己亥築寶應縣泥光白馬二湖隄

庚子工科都給事中趙毅為工部左侍郎

夜大星青白光燭地出雲中

三劫寅朔策貢士楊相等四百七十二人於奉天殿賜曾榮周

述周孟簡等進士及第出身有差

甲辰內官張勤等往賜麓川緬甸孟養土官綵幣

丙午湖口知縣石魯為陝西道監察御史

丁未選翰林院庶吉士楊相宋子環王訓王直秦政學徐安

吾紳彭汝器周忱劉子欽周文李寧張徹章朴歐陽俊盧翰

梁任熊直王道曹景暉陸孟良蕭省身劉孟鐸柴廣敬張宗

璉田忠魯輿賢洪鐘洪順余學夔陳瑞蕭清劉紹林鳳張憲

歆昂嚴光祖余順段民李貞江鉞章啟倪維哲許瓔陳敬宗

王伸壽李迪袁添祿李時勉楊槃並習文湯流王英孫奉余



鼎李永年袁邇周遠鍾旭彭禮戴弘演並習書戶部辦事進士當塗李銜以年少自請命改庶吉士同江寧楊勉習書  
姚士彝回國朝隆禮賜甲賜第後即官翰林若考選使讀  
中秘書自永樂二年甲申科始名為制科得與選多由禁  
近人皆榮之然亦有遇有不遇如永樂丙戌壬辰己未辛  
丑甲辰五科合庶吉士凡百二十三人曾無一人官內三  
品者至成化丁未二十三人與鼎甲得五相十卿而得謚  
者十二人惟刑侍汪儀不得謚耳若隆慶戊辰今亦二十  
有三而內閣七人登卿事者十有七人數前後相若賢盛

大過之更可恠者嘉靖壬戌一甲三人皆入閣正德辛巳一  
甲三人皆為外官何榮否不相匹若此有如世廟丙戌  
己丑館選合四十人俱照賜第出身選格以部科中行州  
縣散館此蘿峰公作用也惟正統戊辰浙無一人最為短  
氣蓋自永樂考選至今日庶常極多者永樂己未六十二  
人極少則正德戊辰五人而已

唐成吏部奏有千戶奏薦士武人也朝命不及請坐違制罪  
上曰不及命慮其昧知人能薦忠心也試而果才即授官  
刑部奏方禁銀交易江夏民有父死以銀買塋具上曰禁



銀交易恐鈔輕耳詩曰凡有有喪匍匐救之其救勿治曰  
辛亥夜大星赤光自天布西垣行至近濁一小星隨之  
丁酉雲南都指揮使曹隆為後軍都督同知  
己未琉球國山北王攀安知入貢

唐申上諭刑科都給事中楊恭等曰朕命御史給事中撫  
安中外要以禁止奸慝導為善而已昨給事中丁瑛至四川  
見無犯者乃陰遣親信用銀誘民交易已則執之昔唐太宗  
以物試人待其受之則加之罪賴魏徵諫止古人以光明正  
大治天下苛則不堪偽則不信脫小民畏法反執陰誘者於

官易用治之都察院其執瑛論罪

翰林院編脩王達為侍讀學士

辛酉大理寺左少卿呂震為寺卿右寺丞吳中為左少卿

壬戌知縣何廣任壇田本宋珙主簿古彥輝鄧宗文

政司都事呂彥機 衛經歷羅仲頴 府知事王順舉

監生李矩周正秦瓚魏清文振許信閔和呂衡楊祥楊儼任

重王理陸必壽王良俱為監察御史

工晚御右順門召後軍都督府及兵部官皆不在列御史劾  
奏上曰朕命之矣有司早朝奏事無者治事署解中不在



列必無其可奏也

甲子諭六科給事中曰爾職居近侍比不聞一言軍民利病何也君資臣成治臣不輔法是不忠可退思之條析以聞

遠東都指揮同知何琪失機論死

乙丑諭世子及郡王高煦至京師

丙寅安定衛指揮朵兒只束等來朝請納馬五百給布絹後

仍予茶

戊辰敷惠王允熾改封甌寧王世祀懿文皇太子

己巳諭六科都給事中馬麟等曰爾等疏駁奏牘一字之悞

皆喋、毛疵甚矣文書委積人精力偶敝自今奏內數日月

日等錯謬令旁注印蓋之不必以聞麟等曰有不稱臣者

上曰下豈敢慢工或粹遽漏書亦旁增之爾等在朕左右凡

天下何弊當革何利當興何所軍民未安何人奸邪未去當

歷舉以言如此細故可略也

庚午工御武英殿語侍臣曰人君進退人皆須服衆若進

一人而皆知其善則誰不為善退一人而皆知其惡則誰敢

為惡非然者私愛私惡何以服天下

四朝未朔勅曰朕惟天下武臣祀石矢冒霜雪累積功勤致有



爵位或承祖父往有犯刑朕不忍遽絕其世皆請之遠方今已踰歲其令輕者復職重者立功自贖

遣指揮完者瓦那海百戶亦刺斯等勅諭瓦刺馬哈木等賜文綺并諭和林等頭目

簡東宮官屬淇國公立福兼太子太師成國公朱能兼太子

太傅吏部尚書蹇義兼詹事工部右侍郎金忠為兵部尚書

俱兼詹事兵部右侍郎墨麟工部左侍郎趙毅俱兼少詹事

吏部科給事中朱原真刑科左給事中陸善俱為詹事府丞

壬申僧錄司左善世道衍為太子少師復姓姚賜名廣孝

禮部尚書李至剛兼左春坊大學士翰林院侍讀學士解縉

為學士兼右春坊大學士侍讀黃淮胡廣為左右庶子胡儼

為左諭德皆仍兼侍讀侍講楊榮為右諭德仍兼侍講楊士

奇兼左春坊左中允北京行部主事尹昌隆為左中允脩撰

李貫為右中允仍兼脩撰吏部左侍郎許斯溫兼左贊善編

脩陳仲完為左贊善仍兼編脩檢討王汝玉為右贊善仍兼

檢討國子博士徐善述監察御史王子沂為左司直郎國子

助教晁鎮刑科給事中王文貴為右司直郎刑部司務楊正

國子博士楊斌為左右清紀郎教授程禧教諭黃貫為左司



諫教諭張祥梁良為右司諫編脩楊溥中書舍人姚友直為  
司經局洗馬溥仍兼編脩戶科給事中吳牧兼校書吏科給  
事中梁質兼正字教諭劉真為校書訓導王雅為正字  
禮部郎中汪原進工部主事程石琛為漢府左右長史兵部  
郎中顧晟工部員外郎盧威為趙府左右長史  
癸酉北京行部郎中李繼鼎改禮部儀制郎中兼右贊善  
廣西思明知府黃廣成乞諭安南還祿州西平州永平寨侵  
地許之  
進士李衡自訟其父洪武中受法不當違令干進上曰右

人極鉉與禹朕不爾罪爾其勉之

甲戌立世子高熾為皇太子封漢王高煦趙王高燧詔天

下封楚府孟煒崇陽王孟燾通山王孟燦通城王孟昭景陵

王孟燿岳陽王蜀府悅耀華陽王悅燁崇寧王悅斡崇慶王

悅煥保寧王代府遜煊為世子遜焜廣靈王遠府貴哈長陽

王貴燮遠安王貴燮興山王貴煊巴東王貴燧潛江王貴燧

宜都王貴斡松滋王寧府磐斌岷府徽燧俱世子徽燧鎮南

王谷府賦灼世子賦燾醴陵王韓府冲燧世子冲燧襄陵王

冲燧臨汾王晉府美圭世子初上靖內難謂次子高煦武



便使從師領勅騎接戰白溝東昌有功及浦子口上戰卻  
高煦博胡騎力戰敗盛庸故甚愛之及即位密召丘福王寧  
學士解縉等議儲福寧曰二殿下功高於世子立子以長平  
世之道也縉頓首曰以臣所見異是也世子忠敬仁孝天下  
莫不聞異時守成令主也且夫奪長為亂道侍郎金忠庶子  
黃淮主事戶昌隆各正對上猶持之久乃定冊太子曰咨  
爾朕之嫡長朕藩於燕爾為世子聰明純厚孝友溫恭朕平  
內艱爾功居守事上恤下至仁小心茲授爾冊賢命爾為皇  
太子爾惟夙夜祇承為善無間一念過虧大德之累爾宜念  
之學勿至迂明勿至察嚴勿至猛寬勿至縱謙卑遜志容受  
忠良勤儉安詳惠鮮衆庶以承宗廟以保社稷爾其敬之  
談遷曰唐臨苗王隆基誅韋氏兄宋王感器曰時平則先  
嫡長世亂則先有功當時題之靖難之初漢庶人血戰陷  
堅諸將屬心浦口之役文皇帝以神器相藉重此何異  
秦王世民哉然仁廟守北平亦不遺餘力脫根本之地  
少生隳尺寸雖百庶人何能為以此程之固不當以建成  
事例世子也其後文皇帝迫於讜論割私愛以全震索  
冢法嚴矣亦猶浸尋踰歲爰開鶴禁豈非嫡長天定巧力



俱無所撓乎

丁丑諭三法司出淹獄

寶慶知府儀智為通政司右通政兼右春坊右中允

前浙江布政司右叅政趙雅使安南還進刑部右侍郎

唐辰封志均渭南王

命戶部尚書太康王純仍浙江左布政使致仕純洪武中舉

秀才授禮部主事改長沙通判免復舉明經授壯年通判試

吏部郎中遷福建左叅議至左叅政使百夷卻贖進浙江左

布政建文中拜尚書上即位解印給半祿後撫北京山東

告老有文學雖蘆靜而脂韋過大議無所可否云

監生湯銘游顏為刑科給事中

壬午封汪應祖琉球國山南王應祖故山南王承察度從弟

攝國事歲貢

癸未麓川平緬宣慰司各入貢訢孟養木邦數見侵命丙午

侯遣諭之

甲申文華寶鑑成初命儒臣輯古嘉言善行至是御奉天門

召皇太子面授之其書視太祖嗣君昭鑒錄加廣益以

太祖寶訓



有官軍採木安慶凌脅民貨誣其誹謗縛送刑部獄上  
曰諺恒言軍強民弱必軍誣民下府部訊實遂釋民抵官軍  
罪并罪刑部官之枉民者

進士沈升孫子良李昌祺羅汝敬冷敬蕭寬褚讓獨孤樂善  
陳士啟陳綱董鏞劉子敬陳伯恭陳資善趙曾趙濟劉剛尤  
儀劉澄黃揚俱改庶吉士脩書

乙酉長山王賢燮來朝

免順天永平保定順民田租十九萬九千七百餘石  
夜火星犯天鐳四星

丙戌廣西柳州慶遠等叛蠻陳公宣等就撫  
上朝罷諭六科給事中曰朕可否庶務或有失中爾等直言  
顧解縉曰敢為之臣易求敢言之臣難得

戊子夜金星同井

己丑勅文武群臣曰今天下雖安民未蘓息郡縣豪猾遇有  
征繇並緣為奸細民不勝盜賊滋起爾等其悉心政務毋橫  
斂一錢毋妄興一役稱朕閔念元元之意

韃靼頭目脫兒火察為左軍都督僉事哈兒歹為都指揮同  
知署朵顏衛事毋出及土不中俱為都指揮僉事署福餘衛



事忽剌班胡為都指揮僉事署秦寧衛事時指揮蕭工都等  
使兀良哈各頭目隨朝三百五十四人各授官有差詔  
庶貢北京行部右侍郎劉翼南改禮部右侍郎

開四川資縣并鹽

壬辰前遷江知縣梁護服闋復浙江道監察御史

建文中降

甲午更定天下衛所也田守城軍士視地之夷險要僻臨邊  
險要者守多於屯在內夷僻者屯多於守地雖險要運輸運  
難至者屯亦多於守

夜大星青白光自翼宿行至游氣

丁酉夜水星犯畢

己亥鄆陵知縣婁觀復福建道監察御史建文初降縣

設老樞軍民宣慰使司土官刀線互為宣慰使

是月倭十二艘犯寧波穿山百戶馬興死之尋寇蘓松







聖